

**S T E N O G R A M  
KONSTITUIRAJUĆE SKUPŠTINE  
KANTONA SARAJEVO**

**održane 21.11.2014.godine sa početkom u 10, sati  
u sali Općine Centar**

## **Predsjedavajuća Mirjana Malić:**

Ja vas lijepo molim predstavnici medija budite ljubazni, stanite sa strane. Ja lijepo molim još jedanput predstavnike medija da poštuju protokol i sklone se na predviđeno mjesto za njih. Poštovane dame i gospodo,

U skladu sa članom 7. stav 2. Poslovnika Skupštine Kantona Sarajevo otvaram Konstituirajuću sjednicu Skupštine Kantona Sarajevo.

Zadovoljstvo mi je pozdraviti novoizabrane poslanike Skupštini Kantona Sarajevo, kao i sve one koji su tu dužnost obavljali do sada, članove Vlade Kantona Sarajevo, predstavnike Grada Sarajeva, sve predstavnike opština, općinskih vijeća, uvažene predstavnike CIK-a, predstavnike sindikata i udruženja, predstavnike Međunarodne zajednice kao i predstavnike medija koji prate rad današnje Konstituirajuće sjednice.

Poseban pozdrav u ime svih nas upućujem gledaocima Televizije Kantona Sarajevo.

U skladu sa odredbama Izbornog zakona i Poslovnika Skupština Kantona Sarajevo Dnevni red Konstituirajuće sjednice Skupštine Kantona Sarajevo glasi:

1. Uručivanje uvjerenja o dodjeli mandata novoizabranim zastupnicima u Skupštini Kantona Sarajevo;
2. Konstituisanje klubova naroda i kluba Ostalih u Skupštini Kantona Sarajevo;
3. Potvrđivanje prijedloga kandidata za izbor predsjedavajućeg i zamjenika predsjedavajućeg Skupštine Kantona Sarajevo;
4. Prijedlog za izbor povremene Komisije za izbor delegata u Dom naroda Parlamenta F BiH;
5. Izbor delegata u Dom naroda Parlamenta FBiH.

### **Prelazimo na realizaciju Prve tačku dnevnog reda.**

#### **AD – 1.**

### **URUČIVANJE UVJERENJA O DODJELI MANDATA NOVOIZABRANIM ZASTUPNICIMA U SKUPŠTINI KANTONA SARAJEVO**

U skladu sa odredbama člana 8. Poslovnika Skupštine Kantona Sarajevo predočavam vam dostavljeni Izvještaj Izborne komisije BiH o ovjeri mandata osobama koje su dobile poslanički mandat.

Ja ne znam hoćemo li dva puta čitati, ali evo zadata nam je. Dakle, ovjereni mandat dobili su sljedeći poslanici:

1. Kemal Ademović – Bošnjak – SDA
2. Goran Akšamija – Bošnjak – DF Željko Komšić
3. Neira Avdibegović – Bošnjakinja - DF Željko Komšić
4. Ana Babić – Hrvatica – SBB Fahrudin Radončić
5. Izudin Bajrović – Bošnjak – SBB Fahrudin Radončić
6. Dževad Bećirević – SDP BiH

(to će reći kasnije ko je vratio mandat, ko je poslije, to će vas gospodin iz CIK-a ja imam sada imena i nacionalnu strukturu izabranih poslanika)

7. Nermin Bijeljak – Srbin- BPS Sefer Halilović
8. Seho Bukva – iz grupe Ostalih – DF Željko Komišić
9. Mirza Čelik – Bošnjak – SDA
10. Eldar Čomor – Bošnjak – SDA
11. Sabina Čudić iz grupe Ostalih – Naša stranka
12. Sabahudin Delalić – Bošnjak – SDA
13. Amar Dovadžija – Bošnjak – SDA
14. Selma Filipović – Bošnjakinja – SBB Fahrudin Radončić
15. Edin Forto – iz grupe Ostalih – Naša stranka
16. Semir Halilović – Bošnjak – BPS Sefer Halilović
17. Ismir Jusko – Bošnjak- SBB Fahrudin Radončić
18. Bibija Kerla – Bošnjak – DF Željko Komšić
19. Predrag Kojović – Srbin – Naša stranka
20. Elmedin Konaković – Bošnjak – SDA
21. Muhamed Kozadra – Bošnjak – SDA
22. Zvonko Marić – Hrvat – SBB Fahrudin Radončić
23. Amor Mašović – Bošnjak – SDA
24. Amel Mekić – Bošnjak – SDA
25. Elvedin Okerić – Bošnjak – SDA
26. Mersiha Omerbegović – Bošnjakinja – DF Željko Komišić
27. Mirsad Pindžo – DF Željko Komšić
28. Haris Pleho – Srbin – BOSS Bosanska stranka Mirnes Ajanović
29. Fikret Prevljak – Bošnjak – SDA
30. Dževad Rađo – Bošnjak – SBB Fahrudin Radončić
31. Rasim Smajić – Srbin – BOSS Bosanska stranka Mirnes Ajanović
32. Adnan Solaković – Bošnjak – SBB Fahrudin Radončić
33. Segmedina Srna Bajramović – iz grupe Ostalih – SDP BIH
34. Slaviša Šućur – Srbin – SDP BIH
35. Mario Vukasović – Hrvat – DF Željko Komšić

Dakle ja ću zamoliti predstavnika CIK-a gđina Jusufa Subašića da se obrati Skupštini i uruči uvjerenja o dodjeli mandata novoizabranim poslanicima u Skupština Kantona Sarajevo. I sada ćete čuti i neke izmjene od ovog spiska koji je prvobitno ovjeren.

#### **Jusuf Subašić predstavnik CIK-a:**

Dame i gospodo, uvaženi zastupnici, zadovoljstvo mi je što sam danas ovdje sa vama na Konstituirajućoj sjednici Skupštini Kantona Sarajevo. Na početku želim da u svoje ime i u ime CIK-a BIH čestitam svim novoizabranim zastupnicima na izbornom uspjehu. Također izražavam nadu i vjerovanje da ćete u narednom četverogodišnjem mandatnom periodu opravdati povjerenje koje ste dobili od svojih glasača i želim vam uspjeh u tome. Posao koji nam slijedi nakon konstituirajuće sjednice je izbor delegata u Dom naroda Parlamenta FBiH. U skladu sa odredbama Izbornog zakona ovaj posao treba biti završen u roku od mjesec dana od dana potvrđivanja izbornih rezultata, znači do 10.12.2014.godine. također, bih želio podsjetiti da u skladu sa zakonskom odredbom rok za dostavu izjave o imovinskom stanju CIK-u BIH je 10.12.2014.godine. iskoristio bih ovu priliku da dam i neke tehničke napomene. Uz uvjerenje koje ćemo vam sada uručiti u fascikli ćete imati i izjave o prihvatanju odnosno odbijanju mandata koje je potrebno odmah popuniti. Također imat ćete i Uvjerenje o dodjeli

mandata. To bi trebali popuniti odmah prije polaganja Svečane zakletve. U fascikli se nalazi i Izjava o imovinskom stanju za izabrane zvaničnike koju je potrebno popuniti i dostaviti do 10.12.2014.godine CIK-u BIH. Još jednom upućujem vam iskrene čestitike na osvojenim mandatima i želim vam plodonosan rad. Hvala vam.

**Predsjedavajuća:**

Hvala. Ja bih vas samo lijepo zamolila da s obzirom da ja u oficijelnom spisku koji ste kod nas dostavili nemam izmjene koje su već nastale, pa vas lijepo molim da pročitate ko je novi poslanik/zastupnik umjesto Dževada Bećirevića.

**Jusuf Subašić predstavnik CIK-a:**

Sada ćemo mi pristupiti dodjeli uvjerenja odnosno Uvjerenja o mandatima i prozivat ćemo uvažene zastupnike i prilikom toga ćemo i kazati ovu napomenu koju ste vi kazali.

1. Kemal Ademović
2. Goran Akšamija
3. Hamed Aljović
4. Neira Avdibegović
5. Ana Babić
6. Izudin Bajrović
7. Nermin Bijeljak
8. Seho Bukva
9. Mirza Čelik
10. Eldar Čomor
11. Sabina Čudić
12. Sabahudin Delalić
13. Amar Dovadžija
14. Selma Filipović
15. Edin Forto
16. Semir Halilović
17. Ismir Jusko
18. Bibija Kerla
19. Predrag Kojović
20. Elmedin Konaković
21. Muhamed Kozadra
22. Zvonko Marić
23. Amor Mašović
24. Amel Mekić
25. Elvedin Okerić
26. Mersiha Omerbegović
27. Mirsad Pindžo
28. Haris Pleho
29. Fikret Prevljak
30. Dževad Rađo
31. Rasim Smajić
32. Adnan Solaković
33. Segmedina Srna Bajramović
34. Slaviša Šućur
35. Mario Vukasović

Dakle, još samo jedno pojašnjenje, Aljović Hamed je dobio mandat nakon što Dževad Bećirović nije prihvatio mandat. I Aljović Hamedu ću ja kasnije uručiti Odluku o dodjeli mandata sljedećem kvalificiranom kandidatu. Još jednom, zahvaljujem vam se i molim vas da odmah pristupite ispunjavanju uvjerenja o prihvatanju mandata, jer ukoliko neko ne želi da prihvati mandat, potrebno je odmah da to kaže da ne bi polagao Svečanu zakletvu.

**Predsjedavajuća:**

Najljepša hvala predstavnici CIK-a. Ja bih sačekala dvije minute da potpišete izjave jer ono što slijedi je preduslov za preuzimanje dužnosti a to je zajednička Svečana izjava.

Dakle koliko ja mogu da upratim sve kolege novoizabrani poslanici su potpisali ono što im je bila zadaća. Ja vas molim za malo pažnje i da nastavimo ovaj protokolarni dio našeg zajedničkog posla.

Hvala vam lijepo. Dakle nastavljamo sa Konstituirajućom sjednicom.

Kako je predviđeno članom 8. stav 2. Poslovnika Skupštine Kantona Sarajevo poslanici preuzimaju dužnost zajedničkim davanjem i pojedinačnim potpisivanjem Svečane izjave.

Ja lijepo molim uvažene poslanike da Svečanu izjavu daju tako što ćete na svojim mjestima ustati i ponavljati za mnom tekst.

Ja molim za malo tišine i malo pažnje. Ovo je najsvečaniji čin u toku Konstituirajuće sjednice.

**«SVEČANO IZJAVLJUJEM DA ĆU POVJERENU DUŽNOST OBAVLJATI SAVJESNO, PRIDRŽAVATI SE USTAVA I ZAKONA BOSNE I HERCEGOVINE, FEDERACIJE BOSNE I HERCEGOVINE I KANTONA SARAJEVO, ZALAGATI SE ZA LJUDSKA PRAVA I SLOBODE I DA ĆU U SVIM PRILIKAMA ŠTITITI INTERESE BOSNE I HERCEGOVINE, FEDERACIJE BOSNE I HERCEGOVINE I KANTONA SARAJEVO I RAVNOPRAVNOST NARODA I GRAĐANA KOJI U NJIMA ŽIVE».**

Hvala vam lijepo čestitam vam još jednom i nemojte zaboraviti potpisati ovu Svečanu izjavu koju imate kod sebe.

Ja lijepo molim predstavnike medija da nam ne smetaju potpuno poštujući vašu profesionalnu radoznalost ali moramo nastaviti sa radom. Dakle, poštovani novoizabrani poslanici u Skupština Kantona Sarajevo uz čestitke želim vam i sreću i uspjeh u narednom poslaničkom angažmanu i želim vam također da ostvarite dobru, nadasve kolegijalnu saradničku klimu koja je neophodna za uspješan i prosperitetan rad. Ovo je prilika i da se zahvalim svim poslanicima u prethodnom sazivu Skupštine Kantona Sarajevo kao i dosadašnjem Premijeru i članovima Vlade.

Ovako samo apsolvirali tačku 1. današnjeg dnevnog reda. Kako je realizacija narednih tačaka dnevnog reda moguća tek nakon formiranja klubova naroda, i prijedloga za novo rukovodstvo Skupština Kantona Sarajevo, ja sam jedino što mi preostaje je da prekinem današnju sjednicu i da o nastavku koji mora da bude vrlo brzo, ćete biti blagovremeno obaviješteni, a u međuvremenu će se formirati i klubovi naroda i prijedlozi ove privremene izborne komisije i prijedlozi za novo rukovodstvo.

Još jedanput sve najbolje u budućem radu i hvala vam lijepo.

## **S T E N O G R A M**

nastavka Konstituirajuće sjednice

Skupštine Kantona Sarajevo

Održane 23.12.2014.godine sa početkom u 10,00 sati

U sali Gradskog vijeća

**Predsjedavajući Kemal Ademović:**

Molim zastupnike da zauzmu svoja mjesta krećemo za jedan minut.

Poštovane dame i gospodo, uvažene zastupnice i zastupnici, članovi Vlade Kantona, cijenjeni gosti, poštovani mediji, sve vas pozdravljam, kao i predstavnike medija koji prate rad današnje sjednice.

Nadam se da će cijenjeni gledaoci Televizije Kantona Sarajevo sa pažnjom pratiti rad današnje Skupštine, te im upućujem pozdrave, a svima nama želim uspješan rad i ugodnu radnu atmosferu.

Prema evidenciji Službe, sjednici prisustvuje 35 zastupnika, što je dovoljan broj za punovažan rad i odlučivanje. Dakle, nema izostalih, danas su svi prisutni.

Podsjećam vas da smo na prethodnom zasjedanju koje je održano 21.11.2014. obradili prvu tačku dnevnog reda odnosno izvršili smo dodjelu mandata novoizabranim poslanicima /zastupnicima.

Obzirom da je uvažena poslanica/zastupnica Bibija Kerla bila odsutna tada, iz opravdanih razloga prvo trebamo pristupiti uručivanju uvjerenja o dodjeli mandata uvaženoj gospođi, kako bi mogla položiti Svečanu izjavu i pristupiti punovažnom radu.

Nakon toga slijedi imenovanje Komisije za izbor i imenovanja i administrativna pitanja, koja će ujedno imati i ulogu Komisije za izbor delagata u Dom naroda Parlamenta F BiH.

Tako da dnevni red današnjeg nastavka Konstituirajuće sjednice glasi:

1. Uručivanje uvjerenja o dodjeli mandata zastupnici u Skupštini Kantona Sarajevo Bibiji Kerli;
2. Prijedlog za izbor Komisije za izbori imenovanja i administrativna pitanja Skupštine Kantona Sarajevo;
3. Konstituisanje klubova naroda i kluba Ostalih u Skupštini Kantona Sarajevo;
4. Potvrđivanje prijedloga kandidata za izbor predsjedavajućeg i zamjenika predsjedavajućeg Skupštine Kantona Sarajevo;
5. Izbor delegata u Dom naroda Parlamenta FBiH.

**Prelazimo na Prvu tačku dnevnog reda.**

**AD – 1.**

**URUČIVANJE UVJERENJA O DODJELI MANDATA ZASTUPNICI U SKUPŠTINI KANTONA SARAJEVO GOSPOĐI BIBIJI KERLI**

Pozivam zastupnicu Bibiju Kerlu da preuzme Uvjerenje i da položi zakletvu. Molim vas da ponavljate za mnom riječi Svečane izjave.

**«SVEČANO IZJAVLJUJEM DA ĆU POVJERENU DUŽNOST OBAVLJATI SAVJESNO, PRIDRŽAVATI SE USTAVA I ZAKONA BOSNE I HERCEGOVINE, FEDERACIJE BOSNE I HERCEGOVINE I KANTONA SARAJEVO, ZALAGATI SE ZA LJUDSKA PRAVA I SLOBODE I DA ĆU U SVIM PRILIKAMA ŠTITITI INTERESE BOSNE I HERCEGOVINE, FEDERACIJE BOSNE I HERCEGOVINE I KANTONA SARAJEVO I RAVNOPRAVNOST NARODA I GRAĐANA KOJI U NJIMA ŽIVE».**

Čestitam.

Ovim smo iscrpili prvu tačku dnevnog reda, prelazimo na drugu tačku dnevnog reda.

#### **AD -2.**

#### **PRIJEDLOG ZA IZBOR KOMISIJE ZA IZBOR IMENOVANJA I ADMINISTRATIVNA PITANJA SKUPŠTINE KANTONA SARAJEVO**

Ja imam ovdje prijedlog koji su dostavili predsjednici pet klubova u Skupštini Kantona Sarajevo i ja ću ga pročitati.

1. Konaković Elmedin – predsjednik SDA
2. Pindžo Mirsad – zamjenik DF
3. Akšamija Goran – član DF
4. Kojović Predrag član – Naša stranka
5. Rađo Dževad – član SBB
6. Srna Segmedina – član SDP
7. Čomor Eldar – član SDA

Ima li drugih prijedloga? Ukoliko nema, dajem na glasanje predloženi spisak članova Komisije za izbor i imenovanja. Ko je za?

Molim službu da izbroji glasove.

Konstatujem da je Skupština sa 35 glasova ZA usvojila sastav Komisije za izbor i imenovanja i administrativna pitanja Kantona Sarajevo.

Zadatak ove komisije jeste da odmah poslije ove sjednice pripremi i Centralnoj izbornoj komisiji prosljedi liste za delegate za Dom naroda o kojima ćemo se mi izjasniti nakon što Centralna izborna komisija potvrdi te liste. Hvala.

Prelazimo na treću tačku dnevnog reda, a ona glasi

#### **AD – 3.**

#### **KONSTITUISANJE KLUBOVA NARODA I KLUBA OSTALIH U SKUPŠTINI KANTONA SARAJEVO**

Moja je obaveza ovdje i pripremljeno mi je da pročitam poslovničke odredbe koje se odnose na konstituisanje klubova.



U okviru ove tačke dnevnog reda upoznao bih Vas sa odredbama čl. 9. i 10. Poslovnika Skupštine Kantona Sarajevo koji regulišu konstituisanje klubova naroda.

Nakon davanja i potpisivanja svečane izjave, u Skupštini se osnivaju kluba zastupnika konstitutivnih naroda i Ostalih (u daljnjem tekstu: klubovi naroda i Ostalih).

A to su:

- Klub Bošnjaka;
- Klub Hrvata;
- Klub Srba i
- Klub Ostalih

Ako u Skupštini nema izabranih predstavnika nekog od konstitutivnih naroda ili Ostalih, klub tog naroda neće biti osnovan.

Svaki klub naroda i Ostalih bira predsjednika, a može izabrati i zamjenika predsjednika, koji rukovode klubom i usklađuju njegov rad.

Poslovníkom o radu klubova naroda i Ostalih svaki će klub urediti način svoga rada.

Svaki klub naroda i Ostalih bira i predlaže među svojim članovima jednog kandidata za mjesto predsjedavajućeg ili zamjenika predsjedavajućeg Skupštine.

Skupština glasanjem potvrđuje izbor kandidata, i to natpolovičnom većinom od ukupnog broja izabranih zastupnika u Skupštini.

Četiri kandidata čiji je izbor potvrdila Skupština između sebe odlučuju ko će biti predsjedavajući Skupštine i odluku saopćavaju Skupštini.

Ako u Skupštini nema zastupnika, odnosno kluba nekog od konstitutivnih naroda i Ostalih, mjesto zamjenika predsjedavajućeg Skupštine iz tog konstitutivnog naroda i Ostalih ostaje upražnjeno.

S obzirom na citirane odredbe Poslovnika Skupštine, predlažem da se zastupnici podijele prema ovom nacionalnom balansu i da konstituišu klubove naroda, a prije nego što prekinem sjednicu, premijer Muhamed Kozadra je tražio riječ, pa ću njemu dati riječ. Izvoli Muhamede.

#### **v.f. premijera Muhamed Kozadra:**

zahvaljujem predsjedavajući i naravno želim se pridružiti pozdravima svim zastupnicima, članovima Vlade, gostima kao i građanima Kantona Sarajevo. Pošto mi imamo obavezu koje su propisane zakonom o budžetima koje moramo donijeti prije 31.12. tekuće godine za finansiranje potreba Kantona u prvom kvartalu, ona se donosi obzirom da budžet nije donešen do 31.12. i ta odluka može samo da služi za izvršavanje obaveza do 31.03. tekuće godine. Govorim o '15 godini. Ista ta odluka mora se donijeti za Zavod zdravstvenog osiguranja i za Službu za zapošljavanje. Znači oni po istom principu kao i Zakon o budžetima mora za ovaj period se mora donijeti. Dalje, imamo Odluku o reprogramu obaveza po kreditu vanjskog zaduženja. Znači FBiH je donijela i država BiH je postigla sporazume sa MMF-om o reprogramu dijela obaveza koje su trebale se isplatiti tokom ove godine. Međunarodna

zajednica je zauzela stav da se prolongiraju te obaveze. One su prolongirane onog momenta kada je došlo do poplava, prirodne katastrofe i mi moramo donijeti takvu odluku kako bi ušli u red svih Kantona i svih nivoa vlasti koji su reprogramirali. I treća, odnosno najznačajnija odluka koja mora biti do petka donešena. Znači MMF je isto slijedom ove prirodne katastrofe dodijelio 40 miliona kantonima pod istim uvjetima kako je i bio IV Stand by aranžman po kriterijima kako se raspoređuju ostai prihodi, odnosno prihodi od indirektnog oporezivanja prema svim kantonima. I još su ostala dva Kantona ZDK i mi nismo donijeli takvu odluku o zaduženju. Radi se o 11.700.0000 KM kreditnih sredstava koje treba da do petka donesemo i dostavimo takvu odluku prema FBIH kako bi transferirali ove obaveze. U tom smislu ako mi ne donesemo takvu obavezu, po odluci Vlade FBIH ta sredstva će biti raspoređena prema onim kantonima po istom ključu kako jeste. Stoga ja bih zamolio zaista obzirom da smo mi početkom 11 mjeseca donijeli Rebalans budžeta Vlada ga je prosljedila u skupštinsku proceduru i zbog evo nefunkcionisanja, odnosno nemogućnosti da zakonodavno tijelo radi, ja bih zamolio, zatražio hitnu sjednicu kako bi se sve ove tačke stavile na razmatranje i na donošenje, kako bi mogli mi prema višim nivoima vlasti. Radi se o supsidijarnim odlukama koje moramo donijeti mi kako bi Federacija isto to potvrdila i prosljedili prema državi BIH. Zahvaljujem.

### **Predsjedavajući:**

Hvala. Za riječ se javio predsjednik Kluba SDA Konaković Elmedin.

### **Poslanik/zastupnik Elmedin Konaković:**

Poštovani predsjedavajući, poštovane kolegice i kolege, gosti, koji ste danas prisutni na ovoj sjednici, gledaoci TVSA mediji, Esselamu alejkum i dobro vam jutro. Javio sam se po jednoj tački, ako mogu, ako ne iskačem iz Poslovnika i dnevnog reda, predložio bih nešto i po drugoj tački, ustvari postavio bih pitanje pravicima Skupština Kantona Sarajevo. Dakle prije svega molim da mi samo šefovi klubova definišu da li su spremne liste za Dom naroda, jer liste za Dom naroda moraju biti ovjere od CIK-a, komisija mora odmah po prekidu sjednice zaprimiti liste i poslati ih CIK-u. ukoliko nisu, eventualno neko od kolega ili klubova to uradili ili pripremili ja vas molim da u što skorijem roku hitno, ovjerite liste i dostavite komisiji jer ta procedura izbora već smo probili rokove. I procedura izbora je nekim intervencijama i u CIK-u ubrzana oni očekuju od nas liste, da nam ih odmah ovjerene vrate, kako bi smo u toku ove sedmice mogli završiti ono što je naš posao. Dakle oni koji niste ovjerite liste i dostavite ih komisiji za izbor i imenovanje. Druga stvar je tehničko pitanje. Ja znam razloge i potrebu za održavanje te hitne sjednice, tehničko je pitanje kako ćemo sada definisati karakter hitnosti te sjednice kada imamo ili nemamo Kolegij. Dakle nemamo izabrano rukovodstvo Skupštine, ne može se sastati Kolegij, a Kolegij jedini utvrđuje karakter hitnosti po Poslovniku. Dakle, ono što je moje opažanje ili eventualno može biti i prijedlog da onda zaključkom Skupština ono što nije definisano Poslovníkom može urediti. Dakle čak može urediti i karakter hitnosti sjednice, u kojoj imate mogućnost da se opredijelite da se ona desi ili ne desi, hoće li rebalans proći ili neće, to je tema na kojoj se mi možemo bavljati ozbiljno, nekoliko sati, neko kritikovati, neko hvaliti, to nije sporno. Hoće li rebalans proći ili neće ni to nije toliko bitno, ali je bitna ta odluka o zaduženju u kojoj će Skupština Kantona Sarajevo vraćati tih 11, nešto miliona. A ukoliko ne ispuni svoje obaveze u zakonski predviđenom roku neće moći raspolagati tim sredstvima i zbog toga jesu ugrožene vjerovatno i plate budžetskim korisnicima. Ono što još jednom ponavljam je bitno. Da li postoji Kolegij ukoliko nemamo izabrano rukovodstvo Skupštine? Ko čini Kolegij? Ukoliko nema Kolegija onda predlažem da zaključkom Skupština pošto nije definisan Poslovníkom utvrdi karakter hitnosti i odredi datum održavanja te sjednice. Ukoliko neko zna odgovor nek' mi kaže. Ja mislim da nema tog odgovora, da on nije preciziran i da ćemo se vratiti prije ili eventualno da uzmete učešće u

ovoj diskusiji na ovu mogućnost koju nam Poslovnik daje da se zaključkom Skupština odredi da ćemo do kraja ove sedmice održati tu skupštinu, staviti tu tačku dnevnog reda, ona može pasti ili proći. Dakle to je jedino što je po meni bitno da bi se ona desila. Hvala.

**Poslanik/zastupnik Predrag Kojović:**

Zahvaljujem predsjedavajući, pozdravljam sve prisutne. Razumijem kolegu Konakovića, ali se ne slažem sa njim da je ovo neregulisano pitanje koje Skupština treba da reguliše zaključkom. Ovo pitanje zakazivanje hitne sjednice je regulisano Poslovnikom. To što vi sada želite ili postoji namjera Vlade da organizuje tu hitnu sjednicu na način koji nije onaj način koji Poslovnik govori je izmjena poslovnika. Jer i u ovom dijelu u kojem se govori o tome da Skupština može zaključkom regulisati pitanja koja nisu regulisana Poslovnikom se kaže da te odluke i zaključci ne mogu biti u suprotnosti sa odredbama poslovnika. A u ovom slučaju bi zakazivanje hitne sjednice bez Kolegija kao što sam rekao kolega Konakoviću, i u vremenu kraćem koji je predviđeno za sazivanje sjednice, bilo na neki način kršenje Poslovnika. Razlog zbog koga ja o ovome govorim jeste to što bi naše glasanje o ovim pitanjima koje je iznio v.d. premijera gospodin Kozadra bilo vrlo važno. S obzirom da znamo da odluka o privremenom finansiranju predviđa finansiranje Kantona u onim omjerima koji su važili u prethodnim tromjesečjima, prethodne godine u odnosu na njihove realne prihode. A mi znamo da Kanton budžeta Sarajevo nije balansiran odnosno da proizvodi gubitak, pa bi nastavak takve prakse finansiranja Kantona Sarajevo značio da nastavljamo sa proizvodnjom gubitka u naredna tri mjeseca. Hoću da kažem da je finansiranje Kantona Sarajevo vrlo važno pitanje i da kada dobijemo materijale sigurno će nam trebati da se prema njima odredimo. Ovo je sasvim sigurno nešto o čemu je trebalo razmišljati se možda u prethodnih 15 dana kada se ništa nije dešavalo u Kantona Sarajevo. Hvala.

**Poslanik/zastupnik Elmedin Konaković replika:**

Ovo je jedan uobičajujući početak dinamičnih sjednica u narednom mandatu. Dakle ja se ne slažem da u suprotnosti sa odredbama poslovnika. Kolegij je formiran samo radi, kako kaže član 16, unapređenja efikasnosti usklađivanja rada, Skupština uspostavlja Kolegij Skupštine. Dakle, on nije nikakav ni naredbodavni ni zakonodavni organ i on je formiran zato da se stvari dešavaju brže nego što bi nas 35 dogovorilo. U ovom slučaju mi to nemamo. A imamo potrebu i da izrazimo karakter. Kolegij je dio Skupštine, dakle nije neki poseban organ a dio Poslovnika koji kaže da sve što nije Poslovnikom uređeno može se urediti zaključkom, nam daje mogućnost da mi danas kažemo samo jednu stvar koju ja imam potrebu sebe radi. Dakle da hoću da se pobrinem da mi iskoristimo administrativni prostor da obezbijedimo ljudima plate. Dakle rebalans je nešto što se može kritikovati, politizirati može se ukazati na greške Vlade, slažem se da ima malo vremena. Ali isto tako mislim da posebno zastupnici iz mandata prošlog znaju dobro šta su to greške ili nisu, ili su prednosti pa ćemo se mi tu porazgovarati, ali ovdje je veći problem ta odluka o zaduženju, koja se bez tačke rebalansa na dnevnom redu ne može tretirati. I mi ćemo plaćati 11 koma nešto miliona nečega što će potrošiti Zenica i Tuzla a nećemo imati priliku da našim budžetskim korisnicima prije Nove godine obezbjedimo plate, i to vjerovatno znači ovi predsjednici sindikata koji će sutra ovdje doći, izvesti ljude štrajkovati u suštini ne znam, nema neke prevelike političke odgovornosti u godini koja nije ni izborna i nema previše prostora za neku politiku. Mislim da je ovo ipak pitanje funkcije i pitanje naše volje da li da tim ljudima obezbjedimo mogućnost da dobiju platu prije Nove godine. Svima, dakle nije samo sindikatu osnovnog obrazovanja, kog sam ja vidio da već priprema i šaljem nam neke poruke. To je naš dio posla i ja predlažem model kako da ga riješimo. Rebalans ne mora proći, možemo se na njima svađati, ukazati na sve nepravilnosti ove Vlade a ta cifra od 11 koma nešto je novih teret koji ćemo plaćati, nećemo isplatiti plate, a potrošiti će nam ga Zenica i Tuzla, ja sam zbog toga razmišljao. I to jutros,

nisam ni ja znao sve te informacije. Šta je mogući put. I ja to vidim kao jasan mogući put i ni jednim svojim prijedlogom ni jednom svojom riječju nije u suprotnosti sa odredbama poslovnika. Dakle on nam je ostavio mogućnost. I u suprotnom bolja je opcija da izaberemo rukovodstvo, što mislim da se neće desiti. Dakle nemamo toliko vremena da izaberemo i rukovodstvo i sazovemo Kolegij ili eventualno imamo. Onda nemamo potrebe. Ako se to desi, nema potrebe. Ako se ne desi. Ja predlažem da to bude zaključak: ukoliko se ne odabere rukovodstvo Skupština predlaže hitnu sjednicu datuma, evo nekog, može Kozadra obrazložiti, jer on ima rok u kojem mora poslati tu odluku o zaduženju da bi ona bila implementirana. To je petak. Dakle do petka, ukoliko to uradimo, ima 11 miliona koje svakako vraćamo. I ima plata. Ukoliko ne uradimo, nema. I ona može biti izdvojena od Rebalansa cijelog ali mora biti ta tačka dnevnog reda mora biti hitna sjednica. Ako ima neko bolji model ja ga prihvatam odmah. Dakle ovo je ono što ja jedino vidim u ovom trenutku kao mogućnost.

### **Predsjedavajući:**

Hvala Konakoviću. Dobro ste rekli i jedan i drugi, ova oblast je uređena Poslovníkom i Poslovník kaže da karakter hitnosti određuje Kolegij., na samoj sjednici Skupština utvrđuje dnevni red. Što nam ostavlja mogućnost da Skupština u hitnoj sjednici na samom početku sastavi dnevni red. Dakle to ne radi Kolegij. Mi imamo sada zaista jednu specifičnu situaciju. 23 je decembar. Dakle, donošenje odluke o privremenom finansiranju je neophodno i neizbježno. Donošenje ove druge odluke i razmatranje rebalansa je isto tako neizbježno zbog činjenice da je Vlada blagovremeno u jedanaestom mjesecu prema Skupštini dostavila utvrđeni materijal koji danas može biti podijeljen zastupnicima ukoliko donesemo zaključa da se održi ova hitna sjednica. Ja ću ipak Skupštini predložiti sljedeće da se dogovorimo o tome da se održi ova hitna sjednica u petak, recimo u 10,00 sati, da odmah danas se distribuiraju materijali. Na samoj sjednici da se utvrdi dnevni red kako to kaže Poslovník, tako da nećemo prekršiti Poslovník. Taj dnevni red ne mora biti usvojen ali Skupština bi morala da tretira kompletnu ovu materiju. Dakle morala bi, obaveza joj. Do petka se može desiti da se izabere rukovodstvo. Dakle može biti održan još jedan ovaj nastavak. Danas, petak prije te sjednice, tako da postoji mogućnost da i Kolegij poslovnički dakle sjedne i da verifikuje tu potrebu za hitnim karakterom sjednice. Ali očigledna je situacija ne ulazeći u razloge zašto je nešto da smo mi u situaciji da trebamo održati hitnu sjednicu prije Nove godine, prije 31. i da moramo razmotriti ova neka pitanja. Ne zbog nas, ne zbog politika koje se vode, nego zbog građana i zbog svih onih korisnika koji su na budžetu i koji očekuju da će prema njima se reagovati adekvatno.

### **Poslanik/zastupnik Predrag Kojović:**

Pazite, ne sporim ja činjenicu da postoje stvari koje se moraju uraditi da bi se nastavilo normalno finansiranje Kantona. Sve na čemu ja insistiram ili predlažem jeste da radimo sve dok ne postignemo to na ovaj poslovnički način. Znači nema nikakvog razloga da mi stvarno krenemo i radimo i da sve obavimo ono što treba, uključujući i formiranje Kolegija. U potpunosti se slažem da je Skupština u sebi sadrži Kolegij i tu volju da mi možemo već sada donijeti zaključak Skupštine o održavanju hitne sjednice Skupština Kantona Sarajevo. Pogotovo ako dobijemo materijale sada. Ali mislim da nam to ne bi trebalo služiti kao izgovor da u nekom komfornom momentu prekinemo ovu sjednicu nedovršenog posla tipa izbor kolegija i ostalih stvari jer smo se na neki način za ove vrlo važne stvari obezbjedili. Ja bih volio da ovu urgentnost iskoristimo za jedan intenzivniji i kontinuirani rad dok ne pokušamo postići to sve na poslovnički način. A ako ne uspijemo, uvijek imamo ovaj zaključak Skupštine o održavanju hitne sjednice i materijale, i naravno da ih moramo razmotriti.

**Predsjedavajući:**

Previše je ako. Zato ja dajem na glasanje sljedeći zaključak.

**Skupština utvrđuje potrebu za održavanje Hitne sjednice Skupštine čiji termin zakazujemo u petak u 10,00 sati.**

Ko je za?

Molim službu da izbroji glasove. **Konstatujem da je Skupština jednoglasno sa 35 glasova usvojila prijedlog ovog zaključka.**

Ovo ne isključuje mogućnosti, ja pozivam predstavnike političkih parija i predsjednike svih klubova da ubrzaju sve procese kako bi se što prije došlo do imenovanja rukovodstva, kako bi profunkcionisao i Kolegij Skupštine i nadam se do petka.

Pozivam službu Skupština Kantona Sarajevo da odmah ili u toku dana do 16,00 sati da distribuiraju materijale za tačke koje ne naveo premijer da bi ih trebalo razmatrati u petak. Dakle danas najkasnije do 16,00 sati najbolje bi bilo danas dok su zastupnici ovdje po komisija po klubovima ako je to moguće. Jer vidim da to nije pripremljeno.

I prije nego što prekinemo ovaj nastavak sjednice, da bi se klubovi, a Klub Bošnjaka je predviđeno da ostane u ovoj Sali, a skupštinska služba će dati ostali prostorije za klubove u koje treba da se povučete da bi tamo izabrali rukovodstva. Dakle želim da svim pripadnicima katoličke vjeroispovijesti ovdje u sali a i građanima i gledaocima koji nas gledaju putem TVSA da čestitam nastupajuće praznike, kao i svima da čestitam nastupajuće novogodišnje praznike.

**Poslanik/zastupnik Dževad Rađo:**

Hvala lijepo. Pitanje koje je postavio uvaženi kolega Konaković skupštinskoj službi a tiče se ovjere lista, nismo dobili odgovor. Mi kao politički projekat smo u zakonskom roku predali liste za one ljude, za izbor delegata koje imamo i koje smo kandidovali, međutim nismo dobili nikakav odgovor. I želim da dobijem odgovor šta će se raditi po tom pitanju. Jer ako se ta problematika nije riješila onda je ova zadnja tačka nepotrebna. Hvala lijepo.

**Predsjedavajući:**

Dakle, liste je potrebno dostaviti odmah Komisiji za izbor i imenovanja koja je novoformirana. Predsjednik kluba ili neko koga predsjednik Kluba odredi, ovoj Komisiji dostavlja odmah nakon ove sjednice listu ili liste za Dom naroda. Dakle dostavljate tu listu. Sada odmah.

Dakle, samo malo. Zastupnik Rađo Dževad da li ste zadovoljni ovim odgovorom ili tražite riječ ponovo.

**Poslanik/zastupnik Dževad Rađo:**

Samo da razjasnimo. Znači ovdje imaju dvije mogućnosti predlaganja. Kada predlaže politički subjekat onda mora biti ovjerena potpisom ovlaštenog lica i pečatom. Ali imate zakonsku mogućnost gdje se liste možemo mi svako pojedinačno da predlože i ona je isto tako validna. Prema tome, ove liste koje mi imamo su validne i one ne trebaju ići u CIK.

**Predsjedavajući:**

Zastupniče Rađo listu koju imate, ukoliko je potpisana od predlagača, bio to predsjednik političke stranke ili pojedinac, kako to Poslovnik omogućava, dostavljate Komisiji za izbor i imenovanja koja će u sjednici, verifikovati sve prispjele liste i proslijediti ih CIK-u. Kada CIK ovjeri te liste i vrati ih skupštinskoj službi i komisiji zakazat će se ponovo sjednica da bi se izvršilo tajno glasanje o tim listama u ovakvom zasjedanju.

**Poslanik/zastupnik Dževad Rađo:**

Upravo tako, sada se postavlja pitanje, ako su politički subjekti ili pojedinci koji imaju zakonsko pravo da predlože liste i to su učinili u zakonskom roku, zašto to nije do sada ovjereno, e to je pitanje. I prema tome ova zadnja tačka dnevnog reda danas je nemoguće da se uradi i opet probijamo zakonske rokove.

**Predsjedavajući:**

Hvala zastupniku Rađi. To nije urađeno zato što je tek prije desetak petnaest minuta izabrana komisija koja će da verifikuje te liste ispred Skupštine Kantona.

Uvažene zastupnice, zastupnici.

**Poslanik/zastupnik Elmedin Konaković:**

Dakle ja sazivam Komisiju za izbor i imenovanja u ovoj Sali u 13,00 sati. Sve one koji imaju ovjerene liste od stranaka koje predlažu potpisane, da dostave, oni koji nisu ovjerali a stranka predlaže da ovjere i dostave, a ove koje predlažu pojedinci da dostave. Da imamo kompletnu dokumentaciju da mi nakon ove sjednice odmah CIK-u uputimo u proceduru., u 13,00 Komisija za izbor i imenovanja u ovoj ovdje Sali. Hvala.

**Predsjedavajući:**

Ja sada prekidam ovu sjednicu zahvaljujem se zastupnicama i zastupnicima. Članovima Vlade, gostima. Dakle hitnu sjednicu imamo u petak u 10,00. nastavak ove Konstituirajuće će se desiti kada se ispune ovi uslovi, to je ste kada nas obavijesti komisija da je spremna sa listama ili kada se formiraju klubovi naroda i predlože kandidate za izbor rukovodstva. Hvala vam.

# **S T E N O G R A M**

## **2. NASTAVKA KONSTITUIRAJUĆE SJEDNICE SKUPŠTINE KANTONA SARAJEVO ODRŽANE 06.01.2015.GODINE**

## **Predsjedavajući Kemal Ademović:**

Otvaram drugi nastavak Konstituirajuće sjednice Skupštine Kantona Sarajevo.

Pozdravljam uvažene kolegice i kolege zastupnike, premijera, članove Vlade, predstavnike javnih institucija, udruženja građana, predstavnike Međunarodne zajednice.

Nadam se da će cijenjeni gledaoci Televizije Kantona Sarajevo sa pažnjom pratiti rad današnje Skupštine, te im upućujem pozdrave, a svima nama želim uspješan rad i ugodnu radnu atmosferu.

Prema evidenciji Službe, sjednici je prisutno svih 35 zastupnika.

Podsjećam vas da smo na prethodnim nastavcima, koji su održani 21.11. i 23.12.2014. obradili dvije tačke dnevnog reda, odnosno izvršili smo dodjelu mandata novoizabranim zastupnicima i imenovali Komisiju za izbor i imenovanja i administrativna pitanja.

Tako da današnji dnevni red glasi:

1. Izbor delegata u Dom naroda Parlamenta FBiH
2. Konstituisanje klubova naroda i kluba Ostalih u Skupštini Kantona Sarajevo
3. Potvrđivanje prijedloga kandidata za izbor predsjedavajućeg i zamjenika predsjedavajućeg Skupštine Kantona Sarajevo

Prelazimo na realizaciju dnevnog reda.

### **AD – 1.**

#### **IZBOR DELEGATA U DOM NARODA PARLAMENTA FBiH**

U skladu sa Izbornim zakonom BiH u Dom naroda Parlamenta FBiH bira se 11 delegata i to: 3 Bošnjaka, 1 Hrvat, 5 Srba i 2 iz reda Ostalih.

Uz poziv za sjednicu dobili ste Uputstvo o postupku provedbe posrednih izbora za organe vlasti u Bosni i Hercegovini obuhvaćenih Izbornim zakonom Bosne i Hercegovine.

Molim predsjednika Komisije za izbor i imenovanja i administrativna pitanja da iznese stavove Komisije. Zastupnik Elmedin Konaković.

### **Poslanik/zastupnik Elmedin Konaković:**

Poštovani predsjedavajući, poštovane kolegice i kolege, poštovani gosti, gledaoci TVSA, esselamu alejkum i dobar dam. Sretni vam praznici novogodišnji. Građanima pravoslavne vjeroispovijesti sretni nadolazeći praznici. Komisija za izbor i imenovanja i administrativna pitanja imala je nekoliko sjednica hitnim, brzih, kolegama članovima komisije se prije svega zahvaljujem što su na svaki poziv, nekoliko sati prije održavanja, reagovali i uglavnom, ne uglavnom, nego svaki put se svi odazvali i pokazali time interes i dobru volju da mi proces



koji je zbog zamršenih administrativnih propisa bilo vrlo teško raspetljati, dovedemo u fazu da se danas možemo zvanično izjašnjavati za Dom naroda i time kao Kanton koji nije, čini mi se, jedini nije završio svoj dio posla, odblokiramo taj proces formiranja Doma naroda. Ja ću ukratko, onako hronološki, onaj dio koji vi znate od neriješenog statusa nekih naših kolega kojima je CIK odbio pravo da budu birani u klubovima naroda ili kao predstavnici naroda za Dom naroda, do današnje situacije u kojima ćemo se također morati izjasniti o statusu naših kolega. Mi smo sproveli niz aktivnosti, bilo je bitno da ovjerimo sve liste, da nam CIK vrati ovjerene važeće liste kako bi smo mogli sprovesti izbore. Da one liste koje nisu ovjerene sačekamo procese predviđene za žalbu eventualno kolega koji su se dešavali. Imali smo i žalbu kolega CIK-u, pa apelaciju sudu i danas konstatujemo da je i sud u meritumu riješio te žalbe i odbio te žalbe naših kolega koji su se izjašnjavali u izbornom procesu 2014 drugačije od izbornih ciklusa ranije. I dakle danas je situacija potpuno jasna osim u jednom dijelu: statusa naših kolega i njihovog prava da biraju, njihovo pravo da budu birani kao predstavnici naroda više formalno ne postoji, sud je te apelacije odbio u slučaju kolega koji su se izjašnjavali i radili u Klubu Srba. Lista Ostalih još uvijek ima pravo na žalbu, naše kolegice i ona to pravo može konzumirati još narednih 24 sata, zavisno od svoje dobre volje. I današnji zadatak Skupštine je da uradi ono što je po našem mišljenju trebao uraditi CIK. Mi smo naime kao ključni akt ili dokument smatrali pismo ili upit CIK-u u kom smo tražili da nam CIK odgovori da kolege koje nemaju aktivno biračko pravo da budu birani, kao predstavnici naroda, da li imaju pasivno biračko pravo da biraju. CIK nam na to pismo čak nije ni odgovorio. Vi ga u materijalima imate i zamolili smo službe da vam dostave sve naše i zapisnike i materijale i tokove sjednica i formalne odluke suda i CIK-a. Dakle danas imamo jasnu situaciju koga možemo birati. Imamo malo nejasnu situaciju o tome ćemo vjerovatno svi diskutovati, volio bih da i šefovi klubova i zastupnici uzmu u tome učešća, na koji način ćemo tretirati naše kolege koji nemaju to aktivno biračko pravo. Zaključke ćete sada dobiti. Služba je sada otkucala čini mi se, to što su iz zapisnika mogli izvući. I molim vas zaista za razumijevanje, jer i predstavnici Stručne službe Kantona su radili u ovim teškim uslovima, u tim brzo sazvanim sjednicama, i sa obimnim materijalom. Možda nije sve baš tako perfektno, kako inače bude kada oni imaju vremena da rade svoj posao. Dakle, naše ključno pitanje danas prije izjašnjavanja o listama. Mi smo naime na Komisiji završili proces žrijebanja lista, izvršili smo i štampanje glasačkih listića, sa rednim brojevima kako smo to na Komisiji ustanovili i zaključili, i dakle prije samog izjašnjavanja i glasanja, moramo definisati status i pravo kolega da li dakle ostaju da rade u klubovima naroda po izjašnjenju u izbornom ciklusu 2014 – 2018, što znači da zadržavaju pravo da glasaju unutar tih klubova. Da li nastavljaju svoj rad u klubovima naroda po izjašnjenju u izbornom ciklusu 2010 i 2012, jer CIK tamo kaže da su njihova aktivna izjašnjenja u CIK-u drugačija od onih kako su se trenutno izjašnjavali u ovom ciklusu 2014, i eventualno da li do definisanja statusa ili okončanja eventualnih žalbi učestvuju u radu klubova. Kolege čini mi se imaju neka ljudska prava da do Strazbura mogu tražiti eventualno ostvarivanje svojih prava da onako kako se izjašnjavaju funkcionišu i rade. I eventualno Naša stranka, još pravo na žalbu da ova lista koja je ovjerena sa jednim a ne sa dva kandidata predložena od Naše stranke, ima pravo žalbe u narednih još, čini mi se 24 sata, što bi značilo eventualno čekanje još nekog vremena da onda formalno prođu sva prava na žalbe i formalno sve liste budu ovjerene od CIK-a. Ova još uvijek nije. I možda će nam danas i kolege iz Naše stranke, eventualno o tome nešto reći. Da li će se žaliti ili neće. A prije svega, ja vas molim, ne znam je li Služba donijela ovaj dio izvoda iz zapisnika, da ova tri prijedloga, mi na Komisiji nismo, ni CIK se nije smatrao nadležnim, ni sud se nije smatrao nadležnim da kaže, ako kolege nemaju aktivno, da li imaju pasivno biračko pravo. U drugim primjerima, u drugim kantonima su to također odredile Skupštine svojim izjašnjavanjem o pravima kolega su definisali njihov status. I nama je to danas obaveza, bez obzira je li ili nije naša nadležnost. Ono što smo mi zaključili da šta god mi

danas radimo, mi smo potpuno u okvirima nekog od propisa. Ali smo također ustanovili da po CIK-ovom, po Izbornom zakonu, i uputstvu o sprovođenju direktnih izbora, CIK u startu ima dva različita stava. Jako je teško odrediti se koji od njih. Zakon je naravno najbitniji a oni su uputstvo i taj dio materijala imate. Ako budete pažljivo čitali vidjet ćete da je uputstvo o direktnim izborima drugačije od zakona. Ustvari daje drugačija prava ili čak obavezuje nas da dajemo drugačija prava kolegama koji se drugačije izjašnjavaju. Vrlo je zamršena situacija. Mi smo je raspetljali koliko smo mogli. Dobit ćete i glasačke listiće nakon što odredimo situaciju. Glasanju ćemo pristupiti na način da će Službe ovdje prozivati pojedinačno svakog od vas, ko će doći uzeti svoj listić, zaokružiti na onoj listi na kojoj ima svoje kandidate. Mi ćemo nakon toga izvršiti verifikaciju, brojanje i time napraviti zapisnik koji ide prema CIK-u. O tome ćemo izvijestiti i CIK i skupštinu Kantona i našu javnost. I eto molim vas, dakle prije nego što pristupimo samom izjašnjavanju da eventualno neko od kolega iz Komisije, sve smo odluke donijeli jednoglasno. Ako sam nešto zaboravio da eventualno napomene i kaže i da samo malo još pomognete da ovaj dio prije glasanja riješimo, statusa kolega koji nemaju aktivno biračko pravo. Ako ima eventualno nekih pitanja, ja sam još tu da odgovorim. Hvala.

### **Predsjedavajući:**

Hvala predsjedniku Komisije, zastupniku Konakoviću. Molim Službu da umnoži prijedlog ovih zaključaka i da podijeli zastupnicima. Ima li pitanja za predlagača? Nema. Konakoviću izvoli sjesti, hvala.

Dok nam Služba ne podijeli ovaj prijedlog zaključaka Komisije za izbor i imenovanja, ja sam vas dužan obavijestiti sljedeće. Dakle sjednicu sam zakazo jučer nakon što je završen sastanak Komisije za izbor i imenovanja, na kojem su oni dogovorili praktično proceduru izbora i da to može biti obavljeno. A vidjeli ste iz medija da je CIK dala rok Skupština Kantona Sarajevo da ovaj dio posla uradi do 12.01. bolje bi bilo da danas to uradimo, neko 12 ili 11.

Zbog stenograma, ja ću sada pročitati prijedlog ova tri zaključka koja imate pred sobom.

„Predlaže se Skupština Kantona Sarajevo da se izjasni o statusu zastupnika Harisa Plehe, Nermina Bjelaka, Rasima Smajića i Sabine Ćudić. I to:

1. Da li ostaju da rade u klubovima naroda po izjašnjenju u izbornom ciklusu 2014-2018;
2. Da li nastavljaju svoj rad u klubovima naroda po izjašnjenju u izbornom ciklusu 2010 – 2012;
3. Da li do definisana statusa ili do okončanja eventualnih žalbi učestvuju u radu klubova.

Ja ću dati na glasanje po redoslijedu kako je to ovdje napisano. Validan je. Ima, niko se ne javlja. Zastupnik Slaviša Šućur javio se za diskusiju. Izvoli.

### **Poslanik/zastupnik Slaviša Šućur:**

Ma evo da vam kažem ja ne znam uopšte kako se može postaviti ovakva dilema. Ja ću iznijeti neko moje viđenje. Mislim da su stvari savršeno jasne. Dakle, u kandidatskim listama izjašnjenje naših kolega je bilo takvo kakvo jeste. CIK nije osporio to izjašnjenje i verifikovao im je mandat na osnovu te kandidature, tih lista. I oni uživaju sva prava osim jednog koje je specifično Zakonom osporeno, a to je pravo da budu birani u Dom naroda. Sva druga prava, po meni su apsolutno nesporna. I ja mislim da ako mi zaključimo bilo šta drugačije da ćemo ući u kršenje zakona i kršenje njihovih prava. Meni je to do te mjere jasno da ja ne znam kako se uopšte dilema postavlja. Evo pogotovo mislim da niko nema pravo da njima spori, da je njihovo isključivo pravo da odluče o tome. Eto toliko hvala.

**Predsjedavajući:**

Hvala zastupniku Šućuru. Ima li dalje zastupnika koji se javljaju za diskusiju? Jesam li vidio ruku zastupnika Kojovića? Ne. Oprostite.

**Poslanik/zastupnik Elmedin Konaković:**

Ja ću zaista pokušati da budem također kratak, samo da dijelom pokušam objasniti šta su bile naše dileme, potpuno uvažavajući diskusiju kolege Šućura. Ovdje ne mogu sada da tražim po ovim materijalima, čitali smo ih često, vrlo, ne mogu reći gruba, ali onako interpretacija te odluke, ili definisanje u kom CIK kaže da se uzurpiraju prava drugog naroda su bili nešto zbog čega smo mi vrlo osjetljivo o tome i diskutovali i tražili na neki način da donesemo pravičnu ili pravednu odluku. Da li dakle, još se čini mi se ta riječ nekako radikalnija od ovoga uzurpiranja. I da li smo onda u toj dilemi u kojoj ni CIK ni sud, ne mogu da nam kažu da li je uzurpiranje prava naroda samo to aktivno biračko ili i pasivno biračko pravo, pokušavali dobiti od CIK-a odgovor. Dakle još jednom ponavljam, na taj upit nama CIK nije odgovorio ništa. Nisu čak rekli ni da su nenadležni. A u nekim drugim slučajevima su se proglasili nenadležnim da kažu u kojim klubovima oni kažu, zloupotrijebio je pravo izjašnjenja o pripadnosti konstitutivnom narodu propisano izbornim zakonom. Znači, nije to tako lako. Nije bilo lako ni nama napraviti ni ove prijedloge ni danas nama vjerovatno donijeti odluku, vodeći računa o tome da li su ta elementarna ljudska prava i prava definisana izbornim zakonom koji su u ovom slučaju suprotna nešto o čemu trebamo raspravljati, donijeti odluku. I mi također mislimo da, ova dva člana još jednom vas pozivam da pročitate. Izborni Zakon koji to eksplicite brani, i član 26 Uputstva o direktnom provođenju izbora, koji kažu da kolege moraju biti na listama onako kako su se izjasnili u ovom izbornom procesu. Kako je rekao kolega Kojović, možda je ovo dobra prilika da mi uvidjevši ovu grešku pokrenemo izmjene i dopune nekih od akata i da CIK ubuduće malo drugačije pristupa ovjeri i kandidatnih lista za izbore ili eventualno onda izmijeni ove akte koji govore o direktnim izbornim procesima. Mi također mislimo da kolege bi trebale imati pravo, da im se ne oduzimaju ta građanska prava, da imaju pravo da rade u klubovima kako su se izjasnili, ali je sada već činjenica da CIK kaže da to aktivno biračko pravo da budu birani nemaju. Dakle to je zvaničan stav i CIK-a i suda. Aktivno nemaju, a pasivno da biraju, mi se također slažemo da treba da imaju, da učestvuju u radu tih klubova, da mogu birati, a da ne mogu biti birani. Hvala.

**Poslanik/zastupnik Slaviša Šućur replika:**

Ma samo sam htio da odgovorim kolegi Konakoviću, mislim nije ovo replika u smislu da se mi ne slažemo, nego ja ne vidim tu neke velike dileme. Dakle, CIK se može izjašnjavati o kršenju ili ne kršenju izbornog zakona i pravila. Priču o uzurpiranju prava drugih naroda može eventualno Ustavni sud, ja mislim i niko drugi, i to na zahtjev pripadnika tog naroda da im je uzurpirano, ugroženo neko pravo samim tim. Mislim da ni mi nemamo to pravo da ulazimo u tu materiju. Mislim da je CIK pogriješio što je na taj način formulisao svoj stav jer oni ne ocjenjuju zloupotrebu prava naroda nego kršenje izbornih pravila. I to ne bi trebalo da bude odlučujuće u ovoj našoj raspravi. Ja razumijem i poštujem želju da se bude oprezan. Ali mislim da mi ne možemo da napravimo grešku da uđemo u nešto na šta u suštini nemamo pravo. Činjenica je da je CIK napravio grešku ako je bilo dakle razloga da se reaguje na ovaj dio njihovog statusa, trebali su reagovati kod kandidatskih listi, sve poslije je besmisleno.

**Predsjedavajući:**

Hvala zastupniku Šućuru. Ima li dalje prijavljenih?

**Poslanik/zastupnik Haris Pleho:**

Hvala lijepo predsjedavajući. Prije svega želim sve srdačno da pozdravim i poselamim, kao i gledaoce pored malih ekrana. Ono što je za mene ovdje, tako moram da kažem, apsurdno, a u pravu je kolega Šućur, danas ova Skupština po mom razmišljanju, uopšte ne bi trebala da se izjašnjava ni po bilo kojoj tački od ovih zaključaka koje je Komisija za izbor i imenovanja navela. Činjenica je da smo onako kako smo se izjasnili na obrascu CIK-a već krenuli u svoja prava. Ta prava nam je dao CIK. Vi dobro znate kada se konstituisala sjednica Skupština Kantona Sarajevo da smo mi ovdje svi dobili certifikate. Ono kako su nas deklarirali, to nije sporno, ali time su nam i dali pravo čim su certifikati napisani na ćirilici. U startu sam smatrao svi oni koji pripadaju tom Klubu Srba da na ćirilici trebaju biti ti certifikati i to nije ništa sporno. Druga činjenica, poslije toga, napravili smo konstituisanje naroda gdje Klub naroda Srba konstituisao se, izabrao predsjednika, zamjenika predsjednika, usvojio taj zastupnik i samim tim činjenica je da su naša prava već krenula. Ja ne bih sada da ovdje polemišem dalja naša prava koja ćemo vjerovatno tražiti pravnim putem, ali smatram da smo mi samo izgubili pravo da budemo birani u Dom naroda, obzirom da nam naše liste nisu ovjere od strane CIK\_a. Mi danas imamo pravo biti u tom Klubu, prema mom razmišljanju, biti birani i birati članove za predsjedništvo ove Skupštine. I moje mišljenje je, jer nigdje to nije drugačije definisano da mi nemamo pravo birati u Klubu Srba ljude za Dom naroda. Činjenica je da smo samo izgubili pravo trenutno, tako da kažem, da ne možemo biti birani u Dom naroda. Dakle mi trebamo nastaviti dalje sa radom ove sjednice, tako što ćemo imati pravo da biramo ljude u Dom naroda i da biramo i budemo birani za predsjedništvo ove Skupštine. Hvala vam lijepo.

**Poslanik/zastupnik Mirsad Pindžo:**

Pozdravljam sve prisutne kao i one koji prate ovo današnje zasjedanje pored malih ekrana. Ovaj vruć krompir koji je nama danas na dnevnom redu a ni krivi ni dužni, mi ga moramo razriješiti, na način i u skladu sa svojim ovlaštenjima, ne ulazeći ni u Ustav BIH, čiji je sastavni dio Europska konvencija o ljudskim pravima i građanskim slobodama koja daje pravo svakom pojedincu na izjašnjenje, pa i o nacionalnoj pripadnosti. Ali ni u Izborni Zakon BIH, i odluke Suda BIH koje su za nas konačne i obavezujuće, i ne možemo ih ni komentirati ni mijenjati, nego ih primjenjivati. Činjenica da imamo problem ne samo sa izborom delegata u Dom naroda i pravo kolega, imaju li pravo biti birani. To pravo i to pitanje je riješio sud. Ne ni CIK. CIK u postupku ali na žalbu. I Sud BIH i to rješenje je konačno i tu mi nemamo šta da raspravljamo. Ali imamo o čemu raspravljati, odnosno šta uraditi sa njihovim pravom da biraju u skladu sa svojim izjašnjenjem, u skladu sa ovim aktima koje sam nabrojao. Ja nisam pobornik da oduzimamo bilo kome bilo koje pravo, i tako ću se izjasniti. Po mom mišljenju izlaz iz ove situacije je u Zaključku Skupštine, ne ulazeći u to kakav nam je Izborni Zakon; je li precizan, nije li precizan, kakve su odluke CIK-a, jesu li pogriješili, nisu li pogriješili. Da je CIK pogriješila, Sud bi rekao da je pogriješila i poništio rješenje CIK-a a ne odbio žalbe onih koji su se žalili. Prema tome, ne možemo ulaziti sad ni u tu sferu. Pošto kao legalisti moramo odlučiti da nastavimo raditi, a kao ljudi koji ne želimo ugrožavati ničija prava, po mom mišljenju mi danas trebamo donijeti zaključak kojim se priznaje pravo ljudima na njihovo izjašnjenje da nastave raditi u klubovima u kojima su se izjasnili na izborima 2014. s tim što nemaju pravo biti birani prema odluci viših organa jer ovdje je doslovno rečeno, nemaju pravo biti birani jer su zloupotrijebili pravo izjašnjenja o pripadnosti konstitutivnom narodu, propisano Izbornim zakonom BIH. To vam u prevodu znači da nemaju pravo biti ni izabrani, jer to isto pravo po tom konzumiraju i zloupotrebljavaju to pravo izborom za predsjednika eventualno kluba ili rukovodstva Skupštine, što u kranjem slučaju je nadležnost samo ove Skupštine jer ova Skupština potvrđuje izbor rukovodstva Skupštine. Klubovi naroda izaberu,

predlože, ali Skupština Kantona Sarajevo znači 35 zastupnika potvrđuje to što su klubovi naroda predložili. Da bi izašli iz te situacije ja predlažem da se Skupština Kantona Sarajevo izjasni o Zaključku da se kolegama legalizuje, dozvoljava njihovo pravo da biraju, da rade u klubovima u kojima su se izjasnili, ali da po odluci suda i CIK.-a nemaju pravo konzumirati pravo da budu birani iz tog kluba u koji su se oni opredijelili da će raditi. Hvala lijepo.

**Poslanik/zastupnik Pleho Haris replika:**

Hvala lijepo. Ma gledajte, što se tiče ove zloupotrebe i izjašnjenja, znači apelacije i CIK-a da mi ne možemo biti birani, prvenstveno se to odnosilo na to da ne možemo biti birani kao delegati u Dom naroda, i tu je stvar jasna. Nek mi neko kaže ovdje gdje stoji da mi ne možemo biti birani za predsjedništvo ove Skupštine. To ne stoji nigdje. Činjenica je da CIK samo se oglasio da ne možemo biti birani kao delegati u Domu naroda. Sva ostala prava mi uživamo i već su krenula. To sam vam u uvodu svog govora kazao, u prvoj diskusiji. Ja ne vidim ovdje da iko ima pravo i kazati kako koji poslanik od nas može i treba da radi osim onoga kako se izjasnio na obrascu CIK-a i pri kojem klubu, osim ovo što je kazao CIK i Apelacija da ne možemo biti birani kao delegati u Domu naroda. Mi danas ovdje, vjerujte, po mom razmišljanju, ne bi trebali ni o kakvom zaključku da se izjašnjavamo. Trebamo nastaviti dalje svoj rad i tu je priča jasna. Sve ostalo to je stvarno onda po mom razmišljanju sila politike. Ovdje izgleda niko ne vodi računa o posljedica već samo vodi o političkom cilju pa poslije šta bude. Ovo do sada kolege što su pričali da mi nemamo pravo biti birani i birati kao na mjestu predsjedništva Skupštine, to nigdje ne stoji. Hvala vam lijepo.

**Poslanik/zastupnik Mirsad Pindžo odgovor na repliku:**

Ja bih bio najsretniji da mi uopće danas ne razgovaramo o tome, kolega Pleho vi ste nas doveli u ovu poziciju i ako je izričita odluka CIK-a i Suda BIH koji kaže da je na taj način Pleho Haris zloupotrijebio pravo izjašnjenja o pripadnosti konstitutivnom narodu, propisano izbornim zakonom BIH, samo vas pitam kako onda ne bi zloupotrijebili pravo ako iskoristite tu situaciju da budete član rukovodstva Skupštine? Ja govorim o inerciji ne oduzimajući pravo nikome da ima pravo da bira ali da bude biran, mi možemo samo doći u poziciju da našim zaključkom, kakav god on bio, mi naravno dajemo pravo nezadovoljnom da ima pravo žalbe. Našim zaključkom da imaju pravo birati a nemaju pravo biti birani u skladu sa, po inerciji u skladu sa odlukom suda, samo bi prolongirali u narednih još ne znam mjesec dana, i u ovom slučaju, jer sud se ni CIK nisu izjašnjavali da li bi bila zloupotreba ako konzumirate pravo da budete članovi rukovodstva Skupštine. Naravno da to ne piše jer se nisu mogli ni izjasniti jer nije bio ni predmet. Predmet može biti tek kada se odluči o tom pravu, na ovaj ili na onaj način, ne sporeći nikome. Ja sam bio vrlo jasan. Ovdje nema nikakve politike, što se nas tiče mi prihvatamo da ljudi imaju pravo da se izjasne, imaju pravo da budu šta hoće i da se osjećaju kako hoće. Ne uskraćujemo ta prava, ali primjenjujući odluke CIK i suda koji su kazali da je zloupotreba ako im se dozvoli da koriste to pravo. Mi se ponašamo u skladu s tim i tako ćemo se izjasniti. Hvala lijepo.

**Poslanik/zastupnik Haris Pleho odgovor na repliku;**

Hvala lijepo. Dakle, moram da repliciram kolegi Pindži. Ono što je ključno ovdje, Pleho, Smajić i Bjelak sigurno nismo mi doveli ovu skupštinu u bilo kakvu zavrzlamu i nepravilnost. Ako je iko to uradio to je CIK sa samim tim kada nam je ovjerila obrazac CIK-a prije nego što smo se našli kao kandidati na izborima. To je ključna stvar. Ne želim da iko krivicu prebaciva na nas personalno, isto kao što na dva pitanja CIK nije odgovorila upućena od strane Komisije za izbor i imenovanje gdje taj vrući kolač, tu lopticu želi da prebaci nama samima. Nije bi bilo pitanje, niti je postavljano bilo kakvo pitanje ni žalbe vezano za izjašnjavanje da li mi možemo biti i birati i biti birani za ovu skupštinu u predsjedništvu. Bilo je samo pitanje žalbe

koju smo mi uložili apelacije zato što nam nisu liste ovjerene. Naša prava, to tvrdim, sigurno su djelimično uskraćena od strane CIK-a gdje ćemo mi to pravno dokazivati, ali što se tiče djelovanja u Skupštini Kantona, naša prava nisu upitna. Nigdje ne stoji da mi zloupotrebjavamo ako budemo bili izabrani u predsjedništvo Skupštine. Na koji način. Vi svi znate bolje od mene, obzirom da sam ja tek ovdje, prvi mi je mandat, imamo klubove naroda koji natpolovičnom većinom donose odluke u skladu prije svega poslovnika, i ova Ustava u Kanton Sarajevo. Ja smatram da i dalje ne trebamo raspravljati o ovom pitanju niti se izjašnjavati oko bilo čega, jednostavno trebamo krenuti jel za izbor delegata u Dom naroda gdje mi možemo birati, ne možemo biti izabrani i tu je stvar gotova. Što se tiče dalje pitanja, možemo uzeti još jednom pauzu kada budemo birali predsjedništvo Skupštine pa još možda malo razmisliti i o tome se odlučiti šta i kako. Hvala.

**Poslanik/zastupnik Predrag Kojić:**

Zahvaljujem predsjedavajući, pozdravljam sve prisutne. Po nama, ja bih volio da ne ulazimo u sam sadržaj CIK-ove odluke i njihove formulacije da se radi o ljudima koji su zloupotrijebili pravo. Iskreno da vam kažem, to obrazloženje koje CIK poslao ne bi prošlo ni na najnižem sudu bilo koje normalne demokratske države. Da bi ste vi rekli nekome da zloupotrebjava neko pravo, morate pokazati na koji način se to pravo zloupotrebjava. Međutim, ono o čemu sam ja htio da govorim kada sam se javio jeste da iznesem vrlo precizno naš stav. Mi vidimo da postoji određena pravna analogija između CIK-ove odluke, da ovim poslanicima oduzme pravo da budu birani u Dom naroda i njihovog prava da budu birani u rukovodstvo Skupštine. I mislimo da se na neki način može izvesti pravna analogija iz odluke CIK-a. Ali ni na koji način ne vidimo da se ta zabrana može širiti na bilo koja druga prava koja proističu iz mandata koji se stiče u Skupštini kada dobijete povjerenje građana. Zato bih samo volio da se držimo, mada ona jeste posredno povezana, ali ova tačka dnevnog reda se zove izbor delegata u Dom naroda i da se možda sada samo odredimo po tom pitanju. Jer jedan od razloga zbog kojih Naša stranka nije konzumirala svoje pravo na žalbu je se zasniva na dvije činjenice; mi želimo da učinimo sve da omogućimo proces brzog formiranja Doma naroda i time i federalne vlasti, i drugi također vrlo važan, željeli smo odustajanjem ili ne korištenjem te žalbe da pokažemo da nisu motivi naše kolegice Sabine Čudić za njeno izjašnjavanje bili njen ulazak u Dom naroda. Prema tome, to je ono što je nama bitno, i to je razlog zbog koga mi nismo konzumirali naše pravo na žalbu, ali se u potpunosti slažem sa kolegom Šućurom da se moramo držati isključivo onoga što je CIK rekao, i nikako ne dirati u neka druga prava, osim one pravne analogije o pasivnom biračkom pravu, pravu da budu birani, odnosno da konzumiraju pravo koja proističu iz opredjeljenja pripadnosti određenoj etničkoj grupi. Hvala.

**Poslanik/zastupnik Segmedina Srna Bajramović:**

Zahvaljujem uvaženi predsjedavajući i pozdravljam sve prisutne. Pa evo na žalost ovo je jedna od situacija koja nam dokazuje kako ustavno uređenje zajedno sa izbornim zakonodavstvom ove zemlje predstavlja scenario po kojem vrlo često gledamo ili na žalost, evo budemo sudionicima rekla bih teatra apsurdna. Država u kojoj je nacionalni tronožac predstavlja matricu svih odnosa, i gdje je to poželjno i gdje nije, na kraju nas dovede u situaciju koja pokaže i dokaže kako to sve može biti toliko iskarikirano da stvari odvedu u potpuno pogrešnom pravcu. Ne želim da osuđujem bilo koga, niti imam pravo na to, ali da treba da budemo mudri, pametni i pravični u situaciji u kojoj smo se našli, izuzetno je važno jer od odluka koje su pred nama, mnoge stvari sigurno i u budućnosti mogu biti najblaže rečeno, potpuno drugačije tretirane. Zbog ozbiljnosti situacije u kojoj smo se našli, smatram da dnevno političke ili mandatne potrebe bilo koje stranke ne smiju biti osnova rješenja za problem koji imamo. Ustav i Zakon su jasni u onom dijelu u kojem su CIK-u omogućili da sačuva vlastiti dignitet kao institucije, dignitet Doma naroda i djelimično izbornog procesa,

jer ostaju dileme, evo kako vidim, koje su na žalost danas samo naše. Znam da postoje različita shvatanja o pristupu CIK-a ali to smo i čuli, ali nakon odluka CIK-a imamo potvrde odluka Suda BiH, po žalbama i ako smo legalisti moramo staviti tačku na taj dio priče. Danas sam svjesna činjenice kako će svako iz svoje tačke gledišta imati mogućnost da u okviru materije ljudskih prava nađe adekvatnu argumentaciju za obrazloženje koje se uklapa i u odbranu i u kritiku situacije u kojoj smo se našli, i to je u redu. To je ljudski. Ali činjenica ostaje da je odgovornost svih nas pojedinačno, da odluku koju donesemo, odnosno ta odluka bude ustavno i pravno utemeljena i kao takva pravična. Izborna materija ogromna oblast što samo govori u korist onoga što želim predložiti i ponoviti ono što su neke od kolega rekly. A to je da danas izvršimo izbore za Dom naroda, zbog kojih blokiramo proces konstituiranja vlasti na svim nivoima, na drugim nivoima, a da se o eventualnom definisanju statusa zastupnika konsultujemo sa relevantnim institucijama i pravnom strukom, kako bi smo potvrdili zakonitost onoga što se danas stavlja pred zastupnike. Jer bojim se da bi današnje izjašnjavanje o nekim od ponuđenih prijedloga bojim se da nas pogrešno ishitrena odluka može odvesti u žalbe koje neće imati kraja. I mislim da u ovom trenutku potreba za strpljenjem ili savjetom je nešto što nam treba više od svega. I želim da u interesu kolega s kojim ćemo sjediti u naredne četiri godine donesemo racionalnu odluku i usvojimo rješenje sa kojim neko može biti i politički nezadovoljan ali da ipak bude pravno utemeljeno i ljudski korektno. Mislim da za to imamo dovoljno vremena, prostora i pameti. Ako shvatimo da ovo nije jednostavna odluka koju treba tek tako prelomiti preko koljena. Toliko. Zahvaljujem.

**Poslanik/zastupnik Elmedin Konaković:**

Ja ću biti malo direktniji i plastičniji u nekim ostvarivanjima nekih političkih interesa kako eto provejava stav nekolicine naših kolega. Ja na mjestu DF-a da imam politički interes ne bih nikada glasao za ovaj prijedlog da imaju pravo ljudi glasati, ne bi oni time pogriješili ništa sa aspekta Zakona ni sa aspekta nadležnosti, jer bi u tom slučaju imali lakšu prohodnost za svog člana u Klubu Ostalih koji bi išli u Dom naroda ispred Ostalih. Dakle to je činjenica. Oni to ne rade. Dakle nema nikakve veze s tim da neko ovdje ostvaruje neke lične i političke interese. Interpretacija prava pogotovo od pravnika zanemarujući nešto što oni zovu pravna praksa ili sudska praksa i kažete hajde nemoj da sada rješavamo to, nego ćemo neki drugi put, u činjenici da nemamo ni zakonodavnu ni izvršnu vlast formiranu u Kanton Sarajevo ni dva i pol ni tri mjeseca nakon izbora je za mene također paradoks i bježanje od odgovornosti da donesemo ozbiljnu odluku. Onda kada to ne žele te institucije na koje se vi pozivate jer smo mi tom CIK-u pisali i CIK neće da kaže da li te kolege imaju prava da rade u klubu naroda i da budu birani, čak ni da biraju a evo mi ovdje kažemo da ta građanska prava ne osporavamo. Kažete da nije bitna a i za mene je ona suštinska i ključna interpretacija ovog stava CIK-a. Zloupotrijebio je pravo izjašnjenja o pripadnosti konstitutivnom narodu, propisanom izbornim zakonom što bi u slučaju prihvatanja takve radnje onemogućilo da u Dom naroda shodno članu 10. tačka 16. Izbornog zakona bude izabran kandidat relevantnog naroda. A to je proces koji nas na identičan način očekuje u formiranju skupštinskog rukovodstva. I evo neka pravници kažu šta je to pravna i sudska praksa. Mislite li da bi stav CIK-a bio drugačiji kada bi smo mi pitali ima li pravo konzumirati pravo naroda onaj čije je aktivno biračko pravo u CIK-u drugačije i biti iz reda Srba član rukovodstva, naravno da bi bio isti odgovor ne može. Ima još jedna olakšavajuća okolnost, ukoliko sud ili CIK ili Strazbur kaže da može nama je stvar tehnike da završimo taj proces. Jer kako kaže kolega Pindžo, o tome odlučujemo mi. Mi verifikujemo članove rukovodstva Skupštine. Oni između sebe biraju predsjedavajućeg i zamjenika. I ukoliko neko od klubova naroda opozove svog i predloži drugog i mi ga ponovo potvrdimo, taj samo uskače u tu stolicu i nastavi da radi. Ukoliko neki od sudova u državi BiH ili u Strazburu kaže da imaju pravo naše kolege, tehnički mi to u roku od 24 možemo implementirati i dati im to pravo. Za mene je sada potpuno jasno da oni ta prava nemaju jer

CIK kaže, tumačeći ono što je njegova nadležnost, da su zloupotrijebili pravo izjašnjenja. Na isti način potpuno, ja posmatram i tražim da se izjasnimo o prijedlogu kolege Pindže da bi smo nastavili ponovo raditi, a ne da bi ponovo pravili pauze, i da bi ponovo pravili rasprave kada budemo birali rukovodstvo jer nas u nastavku sjednice ili neki drugi dan može očekivati formiranje klubova naroda, delegiranje predstavnika za rukovodstvo Skupštine, formiranje Vlade Kantona Sarajevo. To su koraci koje smo trebali već uraditi a nismo. Dakle, ja se slažem, podržavam i glasat ćemo za prijedlog kolege Pindže ili jedan od prijedloga Komisije da naše kolege imaju pravo da biraju onako kako su se izjasnili. I imam jedno onako retoričko i hipotetsko pitanje. Ako baš nije vama toliko stalo da konzumirate prava tog naroda i budete negdje birani, što se onda bunite. Što bi onda mi danas to uopšte osporavali? Nemojte se buniti, koristite svoja građanska prava, a nemojte uzurpirati ova prava propisana komplikovanim izbornim zakonom i komplikovanom konfiguracijom države BIH. To je tačno i činjenica. Samo smo mi puno bolje prošli na prostorima BIH od onoga što je nama bilo namijenjeno kao jednog grupaciji ili jednom narodu. Tako da to što je ona danas komplikovana, to je tačno, ali je puno bolja od onoga što nam je 92 trebalo biti u BIH. Hvala.

**Poslanik/zastupnik Semir Halilović:**

Hvala predsjedavajući. Pozdravljam vas sve. Mi smo upali u jednu pravnu i političku poludramatičnu situaciju, iz prostog razloga što Ustav BIH garantuje svakome pravo da bude ono što hoće. A CIK kaže da to može da bude samo kod kuće. Da ta prava ne može da konzumira u svom punom kapacitetu. Mi smo ovdje faktički u nekoj situaciju mini Sejdić i Finci. Ovi ljudi, bez obzira kakvu mi odluku danas donijeli, imaju pravo da budu ono šta misle. I mi kao Skupština nemamo pravo da im oduzmemo pravo da budu birani u skupštinsko rukovodstvo i djeluju u klubovima naroda jer je to njihovo izjašnjenje. Ova stvar ako ikada dođe do Ustavnog suda, oni će to dobiti. Imaju pravo da budu šta hoće. Stvar koja se dogodila u CIK-u da oni ne mogu da budu birani u Dom naroda je stvar političke snage, mišića. To nema veze sa Ustavom BIH. To je trenutni omjer snaga po kojem neki drugi ljudi trebaju da budu birani radi nekih drugih odnosa u Domu naroda FBIH. I to je nama ovdje jasno. To nije prvi put. U nekim drugim situacijama CIK je bio puno blaži. Mi smo imali velikog Bošnjaka Džerarda Selmana pa niko nikada nije reagovao. Mi smo imali velikog Hrvata Emila Vlajkija pa niko nikad reagovao. E to su u nekim drugim primjerima kada je potrebno. Sada kada nije potrebno, na ovim ljudima se lome kola. Ja predlažem Skupštini da ovu raspravu što prije završimo jer ovo može potrajati u nedogled i da usvojimo ovaj prvi zaključak da ovi ljudi ostaju da glasaju u klubovima svojih naroda i da biraju u skupštinsko rukovodstvo da budu birani. Mislim da je to korektno radi ubrzanja procesa formiranja vlasti u Kanton Sarajevo. Nije radi Plehe, Smajića, Bjelaka i gospođe Ćudić nije usporeno formiranje Vlade radi njih. To je greška. Formiranje Vlade je usporeno radi drugih stvari. Ne treba na ove ljude prebacivati krivicu, oni je ne snose za to. Eto hvala vam lijepo. Toliko.

**Poslanik/zastupnik Sabina Ćudić:**

Hvala. Ja bih prije svega da pozdravim sviju. Posebno gledaoce i poželim sretnu Novu godinu i nastupajuće praznike. Prije svega, kao politolog moram jednu malu ispravku, čisto da se osvrnem da u čitavoj raspravi pogrešno koristimo pojmove aktivno i pasivno biračko pravo, pa i u samom uvodu. Aktivno biračko pravo odnosi se na pravo davanja glasa. A pasivno biračko pravo se odnosi na pravo da budete izabrani na neku funkciju. Tako da ne govorimo o osporavanju pasivnog biračkog prava već aktivnog biračkog prava. Što se mene lično tiče ovdje se dešavaju dva procesa o kojima mi trebamo odvojeno razgovarati. Odnosno u prvom procesu ne trebamo uopšte razgovarati. Jedna je odluka CIK-a koja se direktno tiče ukidanja pasivnog biračkog prava. I ta odluka CIK-a, bez obzira mi možemo ulaziti u njenu raspravu ili



ne, bespredmetno je o tome ovdje raspravljati zato što se dešavaju neki paralelni procesi, tužbe, koje će možda doći ili neće doći do Strazbura. Znači to nije nešto o čemu se treba oglašavati Skupština. Ono o čemu se Skupština oglašava jeste upravo to aktivno biračko pravo. I svako ukidanje tog aktivnog biračkog prava, bi bio neka vrsta čina političkog nasilja. Moram se složiti i sa kolegom Kojovićem i sa kolegom Konakovićem ako CIK ukida dakle pasivno biračko pravo, to se odnosi na sve funkcije, pa samim tim ne može se birati u rukovodstvo skupštinsko ukoliko ne možete biti birani u Dom naroda. To ne znači da se ja slažem sa CIK-ovom odlukom, niti da je ona pravno utemeljena. Ali to je predmet odvojenih tužbi i odvojenih procesa o kojim odluku ne može donositi ova Skupština. Na isti način na koji ne može donositi odluku o ukidanju prava. I CIK je tu bio eksplicitan i također su bile eksplicitne u drugim slučajevima drugih kantoni u BIH koji su postupili po istoj odluci CIK-a da se ukida pasivno ali ne aktivno biračko pravo. Dakle, da biramo, da učestvujemo u procesu biranja ali ne i da budemo izabrani. Hvala.

### **Predsjedavajući:**

Hvala zastupnici Ćudić. Nemam ja više prijavljenih za diskusiju i zaključujem ovu raspravu. Pozivam zastupnike da se izjasne, evo ponovo ću pročitati Zaključak 1. koji je prijedlog Komisije. Zašto prijedlog Komisije? Zato što je Komisija ispred Skupštine zadužena da uradi ovaj dio posla i mi to moramo tretirati. Dakle mi moramo tretirati prijedlog Komisije. Koji glasi, ovdje je napisano „Da li ostaju da rade u klubovima“. Ovo je upitna, i ovo „li“ ćemo prečrtati i „Ostaju da rade u klubovima naroda po izjašnjenju u izbornom ciklusu 2014-2018“.

### **Poslanik/zastupnik Elmedin Konaković:**

Kao što smo mi očekivali, dakle mi nismo interpretirali isključiv zaključak znali smo da će biti diskusija. Kolega Pindžo ga je dopunio. Dakle ovaj zaključak je dopunio onim što nas očekuje u daljim koracima. Dakle ostaju i hvala kolegici Ćudić, ona je ispravila našu pogrešnu terminologiju, ali je za nas i za mene bitno da se izjasnimo o prijedlogu kolege Pindže, dopunjenom prvom zaključku. Ostaju da rade i imaju aktivno biračko pravo a nemaju pasivno biračko pravo sve dok nam neko od institucija ne kaže drugačije. Proces žalbi će se okončati, završiti. Svaka čast. Kad se završi i kada kažu mi ćemo postupiti odmah po okončanju tog postupka u skladu sa nekom odlukom, nekog od sudova. Dakle taj zaključak je dopunjen i bitan je za funkcionisanje daljeg rada Skupštine. I izvinite što ću iskoristiti ovaj trenutak kao jednu malu repliku ovdje. U pravu je kolega Halilović, nisam ja imao želju to da kažem, niti bih ove ljude optuživao zato što nije formirana vlast. Nije formirana iz političkih razloga, još većina koalicija. Ne moramo to otvarati. Ja se tu slažem. Ne optužujem njih ali kažem da pretpostavka da idemo dalje brže jeste i ovaj dodatak ovog zaključka. Da se definiše odmah status jer to moramo uraditi mi, to neće uraditi niko drugi.

### **Predsjedavajući:**

Prvo ja, imam repliku. Dakle, mi kao Skupština smo niži organ vlasti i postupamo po zakonima, propisima nalogima, sudskim rješenjima, odlukama itd. višeg nivoa. Nemamo potrebe da se ovdje izjasnimo o aktivnom biračkom pravu jer CIK u to nije dohvatio. CIK je govorio i zaustavio je samo pasivno pravo da budu birani. I nemamo mi potrebe da to potvrđujemo niti da tumačimo, nismo pozvani da tumačimo mi odluke CIK-a, odluke Suda BIH, Ustava BIH, itd. Da se radi o Zakonu Kantona koji je donijela kantonalna Skupština, kantonalnom Ustavu itd. imamo mogućnost da tumačimo. Nemamo sada mogućnost da tumačimo. I treba da ostanemo u onom dijelu kojim samo pojašnjavamo samo situaciju a ona je pojašnjena na način da ostaju da rade u klubovima naroda. Dakle, ovo je samo primjena praktično onoga što je CIK već odlučio. Mi ne treba da vodimo računa o žalbama koje će biti izjavljene Strazburu itd. jer život u kantonu ne može stati. Dakle život ne može stati i ne

možemo čekati sada sve te rokove itd. Dakle stoga, ovaj dio zaključka koji je dostavila komisija koji kaže da ostaju u klubovima naroda po izjašnjenju u izbornom ciklusu 2014-2018 podrazumijeva da oni konzumiraju aktivno biračko pravo. A ovo pasivno im je CIK oduzeo. Kako nije oduzeo kada je rekao da ne možete biti, ovdje se opredijelio i kazao za Dom naroda zato što je to u tom momentu bilo na dnevnom redu. Kada bi ponovo sada trebalo ići u ovu proceduru izjašnjavanja oko biranja u rukovodstvo vjerovatno da bi se na isti način izjasnio jer se to može podrazumijevati. Dajte zastupniku Plehi. To može biti samo u formi replike.

**Poslanik/zastupnik Haris Pleho:**

Hvala lijepo. Ma uopšte mi prije svega ne želimo nikakve procese da zaustavljamo. Prvo jedna stvar, ovo upravo vi predsjedavajući što kažete da je ovdje stvar jasna samim tim što nisu nama ovjerili liste za Dom naroda i kao ta prava se prebacuju i na skupštinu Kantona. To su dva različita nivoa. Upravo zbog tih zavrzlama, Komisija za izbor i imenovanje je uputila dva pitanja gdje je CIK trebao da da objašnjenje da bi prevazišli ovu situaciju u kojoj smo se sada našli. Oni su bili pasivni i ušutili se i jednostavno su kazali usmeno da to nije njihova nadležnost. Druga stvar, imali smo istu situaciju ovakvu u ZDK, gdje je kolega Fejzić izjasnio se kao ostali a u mandatu 2010 bio Bošnjak. Skupština je izglasala da on može biti biran i birati u tom klubu kako se izjasnio 2014. mi danas kada bi oduzeli pola prava nekome kao što vi danas to želite a govorite da je to CIK naložio, a nije, CIK se nije očitovao o dva pitanja koja su sporna. I danas su sporna. A šta znači to ako mi u ovom kantonu uskratimo pola naših prava a u drugom kantonu imamo kompletna prava to bih volio da mi neko pojasni. Ono što ja predlažem, upravo ono što je kolega Halilović kazao, jedino što se možemo očitovati o prvom prijedlogu da radimo i budemo u Klubu u kojem smo se izjasnili, da biramo i da budemo birani. A naš karakter upravo ovo što je kolega Konaković kazao da mi imamo cilj da budemo izabrani. Ne. Ovo je možda prilika i da kažem uvijek u prvi plan ste stavljali koji su razlozi izjašnjavanja ovako ili onako na obrascu CIK-a niko nije pitao motive. Ključna stvar je ovdje motiv. Motiv jeste moj, bar govorim u svoje lično ime, jeste razlog izjašnjavanja upravo Izborni Zakon i Ustav koji nam je to omogućio. Činjenica je da je 25 dana CIK imao po zakonu prostora da pregleda obrasce na CIK-u i u roku od pet dana da upozori nekoga ako nije u skladu sa tim izbornim zakonom uradio da to ispravi. Ako ne ispravi neće mu ni dozvoliti da ide u kandidaturu.

**Predsjedavajući:**

Isteklo vam je vrijeme.

**Poslanik/zastupnik Haris Pleho:**

Pa najlakše je tako.

**Predsjedavajući:**

Pa to ste već jednom rekli. Sve ste nam to kazali. CIK nije pregledao na vrijeme i to već sve znamo jer ste to u prvom svom obraćanju kazali.

**Poslanik/zastupnik Haris Pleho:**

Jeste ali me je ponukalo pitanje gđina Konakovića, koji su naši razlozi i ciljevi. Moram da kažem i do kraja da budem jasan, mi i da smo se našli kojim slučajem u Domu naroda mi bi bili sigurno jedni od rijetkih koji bi sačuvali pola miliona maraka budžetu Kantona jer tu ne bi bili ni profesionalci niti bi uzimali paušal. To moram da kažem radi javnosti. Naš nije cilj da budemo izabrani u predsjedništvo i rukovodstvo ove Skupštine, ali jeste mi cilj da mi niko ne

oduzima prava. Hoću da biram i imam potrebu da jednostavno kao i svi ostali poslanici kao što imaju prava.

**Predsjedavajući:**

Hvala vam. Vaše je vrijeme isteklo, dakle mi smo na prvoj tački dnevnog reda koja glasi: Izbor delegata u Dom naroda parlamenta FBiH. Vi ste u svojim diskusijama umiješali i drugu tačku koja je izbor skupštinskog rukovodstva na koju ćemo tek doći. Dakle, mi treba da ostanemo na prvoj tački i da završimo ovu prvu tačku. A ovaj prijedlog Komisije, zaključak 1. koji kaže da ostaju da rade u klubovima naroda po izjašnjenju u izbornom ciklusu 2014-2018 podrazumijeva a mogu učestvovati u glasanju na prvoj tački dnevnog reda. I potpuno ovim rješavamo sve nedoumice. Dakle potpuno rješavamo sve nedoumice i možemo da završimo prvu tačku dnevnog reda i nema potrebe da sada razvlačimo diskusije satima. Ja sam svakako raspravu zaključio, imate pravo samo na replike, intervencije, ispravke krivih navoda.

**Poslanik/zastupnik Mirsad Pindžo:**

Naše izjašnjenje po ovoj tački dnevnog reda odnosi se na izbor delegata u Dom naroda i tu ste potpuno u pravu. Ali ovim zaključkom ja predlažem da riješimo sva buduće eventualne nejasnoće kada su u pitanju ove stvari. I predlažem da samo dopunimo zaključak, malo sam se konsultirao sa kolegama i da zaključak o kome predlažem da se Skupština Kantona Sarajevo izjasni, a vezan je za tačku dnevnog reda gospodine predsjedavajući.

Zastupnici ostaju da rade u klubovima naroda po izjašnjenju u izbornom ciklusu 2014-2018, bez pasivnog biračkog prava u procesima u kojima je etnička opredijeljenost relevantna.

I ja tražim da stavite ovaj zaključak na izjašnjavanje. Hvala lijepo.

**Predsjedavajući:**

Hvala lijepo. Obzirom da ovo što ja imam ovaj integralni predloženi tekst je jednoglasni stav komisije. Sada je to stav Konakovića i Pindže. Izvoli repliciraj da čujem.

**Poslanik/zastupnik Mirsad Pindžo:**

Gospodine predsjedavajući, Komisija nije imala svoj stav nikakav nego kao moguće opcije i alternative ponudila Skupštini za raspravu i usvajanje jednog od zaključaka. Ni o jednom zaključku se nije izjašnjavala. I ovo nema veze da kažemo stav Komisije 1,2, ili 3. Nije ni jedan. Skupština se o tome izjašnjava. Komisija se o tome nije izjasnila ni o jednom zaključku. Navela kao alternative za raspravu u Skupštini kolegama da se o tome izjasne s kim sam se ja konsultovao to je moja stvar. Ovo je moj prijedlog i ja od vas kao predsjedavajućeg u skladu sa Poslovníkom tražim da moj prijedlog stavite na izjašnjavanje. Hvala lijepo.

**Predsjedavajući:**

Dostavite ga u pisanoj formi da se podijeli zastupnicima, u skladu sa Poslovníkom kada već tumačite Poslovník i požurite.

Ima li drugih prijedloga zaključka?

**Poslanik/zastupnik Slaviša Šućur:**

Zaista mislim da ne bi smo sebi trebali dozvoliti da upadnemo u grešku. Ovdje se dvije potpuno odvojene stvari miješaju. Jedno je ono što je po pravu i po propisima i po Ustavu, drugo je šta je politički stav. I mi ne bi smo smjeli da zaključkom politički stav nametnemo kao nešto što je obavezujuće tumačanje za sve organe u ovoj Skupštini. Gospodin Pindžo kao

što je rekao gospodin Konaković iz nekih diskusija se vidjelo, ja nisam iznio uopšte svoj stav po ovom pitanju i kako ću ja glasati u slučaju kandidature nekoga od osporenih. Uopšte ne govorim. Molim vas, pogledajte Izborni Zakon. Ja ću biti slobodan pa ću vam samo: član 4.19 pod 5. kandidatska lista sadrži ime i prezime svakog kandidata na listi, JMBG, adresu prebivališta, izjašnjenje o pripadnosti konstitutivnom narodu itd. Pod 6. izjašnjenje o pripadnosti konstitutivnom narodu ili grupi Ostalih iz stava 5 ovog člana koristiti će se kao osnov za ostvarivanje prava na izabranu odnosno imenovanu funkciju za koju uslov izjašnjenje o pripadnosti konstitutivnom narodu ili grupi Ostalih u izbornom ciklusu, za koje je kandidatska lista podnesena. Dakle to je jasna, potpuno jasna odredba. Poglavlje III Doma naroda parlamenta FBiH za tu vrlo specifičnu oblast pravi izuzetak. Govorim čisto o stvarima koje su savršeno jasne ljudi čitajte Zakon, čitajte propis. Ne možemo sve iz stava 3 sada prenijeti da se odnosi. Dakle ovo je naprijed što sam pročitao opšti dio zakona koji definiše prava onako kako im pripadaju. Poglavlje III ima taj izuzetak i samo tu piše dakle da ne može biti, gdje je navedeno, evo. Znači odnosno se novo poglavlje Dom naroda, u slučaju da izjašnjenje kandidata o pripadnosti konstitutivnom narodu ili grupi Ostalih nije identično izjašnjenju koji je taj kandidat dao prilikom ovjere za neposredne izbore u istom izbornom ciklusu CIK BiH odbit će kandidata na listi. Vrlo specifično i samo za jednu oblast. I nemojte da mi pravimo grešku. Ja samo to tražim da ova Skupština ne dozvoli sebi da napravi banalnu grešku da prekršimo Zakon jer bi se sve drugo bilo kršenje zakona. Kada bude, ako bude neko od njih kandidat za predsjedavajućeg Skupštine nek svaki pojedinac u ovoj Skupštini, svaka politička stranka ima pravo da iznese svoj politički stav, davanjem ili ne davanjem podrške. Ali zaključkom osporiti pravo, mislim da ulazimo u nešto što ne bi smo smjeli. Vas potpuno podržavam, da završimo prvu tačku, držimo se samo onoga što se odnosi na izbor za Dom naroda, mislim da je koncenzus ovdje da ljudi imaju pravo, mislim da je nesporno, ne treba ni zaključak. Pazite, to je nešto što im pripada po zakonu. Toliko nema potrebe.

**Poslanik/zastupnik Elmedin Konaković replika:**

Nadležnost Skupštine definisana Poslovníkom i zakonom je način izbora rukovodstva. Klubovi naroda kako je propisano Poslovníkom predlažu među svojim članovima jednog kandidata, a onda ga Skupština natpolovičnim glasanjem potvrđuje i verifikuje. I sada meni samo nije jasna jedna stvar. Dakle, ja se slažem kolega Ademović je u pravu da se ovdje odnosi, tačka dnevnog reda je ta, i zaključak je jedan od ustvari mi nismo čak rekli zaključak nego kažemo, predlažemo Skupštini da raspravi, pa kaže, da li ostaju da li ne ostaju da li nemaju. I Skupština sada treba da donese stav i kaže: ostaju da rade u klubovima naroda. I sada vi predlažete jednu stvar. Kolega Šućur kaže i vi kolega Ademoviću kažete nemojte sad nego možemo na narednoj tački, evo recimo da i to uradimo. Možemo na narednoj tački kada otvorimo način izbora rukovodstva i tada ćemo opet imati istu diskusiju i tada ćemo ponovo imati isti prijedlog zaključka i tada ćemo vjerovatno ponovo imati iste ruke koje kažu mi mislimo da je ovo što je nama CIK objasnio po tumačenju izbornog zakona je tačno i nećemo dozvoljavati da se konzumiraju na bazi etničkog izjašnjavanja prava koja tom narodu pripadaju. Ili ćemo tada promijeniti stav, pa ono što sada političke partije pojedine kažu da u pravu je CIK ali nećemo ga isto tretirati kada bude izbor rukovodstva, onda ćemo o tome raspravljati kobiva kada bude ta tačka. A ono što je po mom mišljenju također pragmatičnije i praktičnije da bi dalje išli u procese da ovim zaključkom riješimo i to. A ponavljam još jednom, isključiva je nadležnost Skupština Kantona Sarajevo definisana našim Poslovníkom i načinom rada u klubovima naroda. Ako kažemo da sada stavimo tačku i izaberemo Dom naroda i ovi učestvuju u glasanju, tačka, a na narednoj nastavimo tu raspravu, evo ja konstatujem i upozoravam da će trajati još tri sata, da će biti isti epilog i ja ne vidim samo za to potrebu. Mislim da bi taj zaključak odredio dalji tok, a imamo pravo da predlažemo zaključke i da se o njima izjašnjavamo. Hvala.

**Predsjedavajući:**

Hvala zastupniku Konakoviću. Moj odgovor na vašu repliku ili replika vama, ne znam jeste li meni odgovarali, ali spominjali ste me.

Dakle, pod prvom tačkom dnevnog reda je izbor delegata u Dom naroda. Taj posao ćemo završiti na sljedeći način; prvo, obzirom da je u poslovničkoj proceduri zastupnik Pindžo predložio zaključak kao zastupnik, taj zaključak ću ja dati na glasanje. Ukoliko taj zaključak dobije ili ne dobije potrebnu većinu, mi ćemo pristupiti po proceduri glasanju prema listama uz aktivno biračko pravo koje imaju svi ovi zastupnici ovdje prisutni, kojima je pasivno za izbor delegata u Dom naroda CIK uskratio. Da ne kažem oduzeo – uskratio. Dakle, tako će stvari ići dalje. Neće više biti mogućnosti predlaganja daljih zaključaka jer sam ja raspravu zaključio i napravio sam jednu grešku kada sam rekao nakon zaključene rasprave ima li još neko. Nema više. Zastupnik Pindžo je u svojoj diskusiji to prije zaključenja rasprave predložio, ali evo to nije otkucano, kuca se. Kada se otkuca to će biti potpisano, podijeljeno svi ćete imati na klupama i o tome ćemo se izjasniti. Da ne bih sada ovdje dalje replicirali i trošili vrijeme dajem pauzu od pet minuta dok se ovi zaključci samo podijele i onda nastavljamo pristupamo glasanju. Hvala.

**NASTAVAK NAKON PAUZE****Predsjedavajući:**

Pozovite ostale zastupnike koji će se izjašnjavati o prijedlog zaključka.

Molim zastupnike da pristupe izjašnjavanju o prijedlogu Zaključka zastupnika Pindže Mirsada, koji glasi:

*Predlaže se Skupštini Kantona Sarajevo da se izjasni o statusu zastupnika Harisa Plehe, Nermina Bjelaka, Rasima Smajića i Sabine Ćudić, i to imenovani zastupnici ostaju da rade u klubovima naroda po izjašnjenju u izbornom ciklusu 2014-2018, bez pasivnog biračkog prava u procesima u kojima je etnička opredijeljenost relevantna.*

Ko je za ovaj prijedlog zaključka?

Konstatujem da je Skupština usvojila prijedlog zaključka, ili donijela zaključak koji je predložio zastupnik Mirsad Pindžo sa 21 glas ZA, dva protiv i 9 suzdržanih.

(Zastupnik Rađo Dževad govori bez uključenog mikrofona)

**Predsjedavajući:**

Molim vas da poimenično izvršite prozivku.

**Pomoćnik sekretara Almira Kulovac Šetkić provodi pojedinačnu prozivku.**

1. Ademović Kemal - SUZDRŽAN
2. Akšamija Goran - ZA
3. Aljović Hamed - SUZDRŽAN
4. Avdibegović Neira - ZA
5. Babić Ana - SUZDRŽANA
6. Bajrović Izudin - ODSUTAN
7. Bjelak Nermin - SUZDRŽAN
8. Bukva Sejo - ZA
9. Čelik Mirza - ZA
10. Čomor Eldar - ZA
11. Ćudić Sabina - ZA

12. Delalić Sabahudin - ZA
13. Dovadžija Amar - ZA
14. Filipović Selma - ODSUTNA
15. Forto Edin - ZA
16. Halilović Semir - ZA
17. Jusko Ismir - SUZDRŽAN
18. Kerla Bibija - ZA
19. Kojović Predrag - ZA
20. Konaković Elmedin – ZA
21. Kozadra Muhamed - ZA
22. Marić Zvonko - SUZDRŽAN
23. Mašović Amor - ZA
24. Mekić Amel - SUZDRŽAN
25. Okerić Elmedin - ZA
26. Omerbegović Mersiha - ZA
27. Pindžo Mirsad - ZA
28. Pleho Haris - PROTIV
29. Prevljak Fikret - ZA
30. Rađo Dževad - SUZDRŽAN
31. Solaković Adnan - ODSUTAN
32. Smajić Rasim - PROTIV
33. Srna-Bajramović Segmedina - SUZDRŽANA
34. Šućur Slaviša - SUZDRŽAN
35. Vukasović Mario - ZA

**Predsjedavajući:**

Konstatujem da je Skupština sa 20 glasova ZA, 2 protiv i 10 suzdržanih i 3 nisu glasala, usvojila prijedlog Zaključka, koji je postao Zaključak Skupštine Kantona Sarajevo, koji glasi:

*Imenovani zastupnici ostaju da rade u klubovima naroda po izjašnjenju u izbornom ciklusu 2014-2018, bez pasivnog biračkog prava u procesima u kojima je etnička opredijeljenost relevantna.*

Hvala.

Molim službu da izvrši podjelu glasačkih listića jer pristupamo glasanju o prijedlozima i po listama za Dom naroda.

**Pomoćnik sekretara Almira Kulovac Šetkić:**

Znači listići se odmah popune i ubace u kutiju.  
(izvršena je prozivka svih zastupnika po abecednom redu)

Ademović Kemal, Akšamija Goran, Aljović Hamed, Avdibegović Neira, Babić Ana, Bajrović Izudin, Bjelak Nermin, Bukva Sejo, Čelik Mirza, Čomor Eldar, Čudić Sabina, Delalić Sabahudin, Dovadžija Amar, Filipović Selma, Forto Edin, Halilović Semir, Jusko Ismir, Kerla Bibija, Kojović Predrag, Konaković Elmedin, Kozadra Muhamed, Marić Zvonko, Mašović Amor, Mekić Amel, Okerić Elmedin, Omerbegović Mersiha, Pindžo Mirsad, Pleho Haris, Prevljak Fikret, Rađo Dževad, Solaković Adnan, Smajić Rasim, Srna-Bajramović Segmedina, Šućur Slaviša, Vukasović Mario

**Predsjedavajući:**

Molim zastupnike da zauzmu svoja mjesta. Pozivam Komisiju za izbor i imenovanja da preuzme glasačku kutiju, da se povuče, da izvrši prebrojavanje, sačini izvještaj prema CIK-u i dajem pauzu od 30 minuta dok oni to završe. Dakle vidimo se ponovo, sada je 12,51, za 30 minuta.

**NASTAVAK NAKON PAUZE**

**Predsjedavajući:**

Nastavljamo sa radom. Molim predsjedavajućeg Komisije za izbor i imenovanja da podnese Izvještaj o rezultatima glasanja.

**Poslanik/zastupnik Elmedin Konaković:**

Dakle od 35 kolega svih 35 i kolegica i kolega je učestvovalo u glasanju. Imali smo jedan nevažeći listić u Klubu Srba. Rezultati su sljedeći:

**LISTA ZA IZBOR DELEGATA U DOM NARODA FEDERACIJE BIH IZ REDA BOŠNJAČKOG NARODA GLASALO JE 23 ZASTUPNIKA I TO:**

ZA LISTU SDA 6,  
ZA LISTU RAĐO DŽEVAD 5  
ZA LISTU KOZADRA MUHAMED 5  
ZA LISTU AKŠAMIJA GORAN 6  
ZA LISTU MEKIĆ AMEL 1

**ZA LISTU ZA IZBOR DELEGATA U DOM NARODA FEDERACIJE IZ REDA SRPSKOG NARODA GLASALO JE 5 ZASTUPNIKA, I TO:**

ZA LISTU ŠUĆUR SLAVIŠA 2  
ZA LISTU NAŠA STRANKA 2  
JEDAN NEVAŽEĆI LISTIĆ

**ZA LISTU ZA IZBOR DELEGATA U DOM NARODA FEDERACIJE IZ REDA HRVATSKOG NARODA GLASALO JE 3 ZASTUPNIKA I TO:**

ZA LISTU ANA BABIĆ 2  
ZA LISTU VUKASOVIĆ MARIO 1

**ZA LISTU ZA IZBOR DELEGATA U DOM NARODA FEDERACIJE BIH IZ REDA OSTALIH GLASALO JE 4 ZASTUPNIKA, I TO:**

ZA LISTU NAŠA STRANKA 2  
ZA LISTU SEGMENDINA SRNA BAJRAMOVIĆ 1  
ZA LISTU SEJO BUKVA 1

Zapisnik i materijali glasački listići su već predati na protokol CIK-a koja dalje vodi proces dodjele mandata, u slučaju gdje je to jasno dodjeljuje mandate direktno, u slučaju gdje je jednak broj glasova, vrši se žrijebanje. O tome će CIK informisati i javnosti i Skupština Kantona Sarajevo. Ja se još jednom zahvaljujem kolegama, članovima Komisije za izbor i imenovanja na vrijednom i predanom poslu i vama na glasanju. Hvala.

**Predsjedavajući:**

Hvala predsjedniku Komisije, Konakoviću. Dakle, čestitam onima koji su izabrani, oni koji idu u žrijeb oni će sačekati čestitke. Dakle i ovim zaključujem današnju našu prvu tačku dnevnog reda.

Prelazim na tačku 2.

**AD – 2.**

**KONSTITUISANJE KLUBOVA NARODA i KLUBA OSTALIH  
U SKUPŠTINI KANTONA SARAJEVO**

Podsjećam vas da smo na sjednici Skupštine 23.12.2014. godine započeli konstituisanje Klubova naroda i Kluba ostalih.

Prije nego što predložim pauzu da bi se izvršilo ovo konstituisanje, ustvari dovršio proces, da dam obavještenja.

Klub Bošnjaka će se sastati u sali br. 100 – sala Skupštine Kantona  
Klub Hrvata u kancelariji br. 105 – kabinet predsjedavajućeg Skupštine  
Klub Srba u kancelariji br. 105 – kabinet Sekretara Skupštine  
Klub Ostalih u kancelariji br. 162 – kabinet dopredsjedavajućih

Predlažem pauzu od 30 minuta radi održavanja sjednice klubova.

**NASTAVAK NAKON PAUZE**

**Predsjedavajući:**

Molim vas da zauzmete svoja mjesta da nastavimo.

U pauzi Skupštine obavljeno je konstituisanje klubova naroda čime su se stekli uslovi da nastavimo sa radom današnje Konstituirajuće sjednice Skupštine Kantona Sarajevo. Time smo iscrpili tačku 2. i prelazimo na realizaciju tačke 3. dnevnog reda.

**AD – 3.**

**POTVRĐIVANJE PRIJEDLOGA KANDIDATA ZA IZBOR PREDSEDJAVAJUĆEG  
I ZAMJENIKA PREDSEDJAVAJUĆEG SKUPŠTINE KANTONA SARAJEVO**

Shodno Poslovniku dakle klubovi naroda predlažu članove za predsjedavajućeg ili zamjenika predsjedavajućeg, a onda oni između sebe izabiraju predsjedavajućeg.

Molim predsjednika Kluba Bošnjaka da predloži kandidata za izbor predsjedavajućeg ili zamjenika predsjedavajućeg Skupštine Kantona Sarajevo iz reda Bošnjačkog naroda. Predsjednik Kluba Bošnjaka. Dobro, obzirom da trenutno u Sali nema predsjednika Kluba Bošnjaka, prelazimo na

Molim predsjednika Kluba Hrvata da predloži kandidata za izbor predsjedavajućeg ili zamjenika predsjedavajućeg Skupštine Kantona Sarajevo iz reda Hrvatskog naroda.



**Poslanik/zastupnik Ana Babić:**

Uvaženi predsjedavajući, pozdravljam vas i kolege

**Predsjedavajući:**

Samo se predstavite jer ja nisam prozvao jer ja ne znam ko je predsjednik.

**Poslanik/zastupnik Ana Babić:**

Hvala lijepo. Ana Babić poslanik Saveza za bolju budućnost.

Predsjedavajući, moj pozdrav vama i svim kolegama također, želim u svoje osobno ime da svima čestitam Novu godinu, jedan lijepi rad u narednom periodu. Također pripadnicima pravoslavne vjeroispovijesti čestitam Badnjak i Božić koji je sutra. Također želim i plodan i ugodan rad na ovoj današnjoj Skupštini.

Kao predsjedavajući Kluba Hrvatskog naroda želim da vas informiram da smo obavili proceduru predviđene aktivnosti i donijeli odluku da ispred kluba naroda Hrvata nemamo prijedloga za rukovodstvo Skupštine, a pošto se kolega Mario Vukasović sam kandidirao shodno našem stavu, i zakonskoj mogućnosti, bilo smo suzdržani. Obzirom na ovakvu situaciju u skladu sa Statutom i Ustavom Skupštine Kantona Sarajevo, poduzete su aktivnosti da se ovaj naš stav verificira. Hvala lijepo.

**Predsjedavajući:**

Hvala predsjedavajućoj Kluba Hrvata. Dakle ovo je neuobičajena situacija da Klub nema prijedlog za rukovodstvo. Nećemo otvarati raspravu. Mogu članovi kluba mogu se javiti za riječ, ovi ostali nećemo otvarati raspravu. Dakle, neuobičajena je situacija da nemamo prijedloga tamo gdje imamo zastupnike, gdje je formiran klub i mislim da će u budućem radu Skupština, morati kroz autentično tumačenje ili zakonodavno pravne komisije ili Skupštine da rješava ovo pitanje.

**Poslanik/zastupnik Mario Vukasović:**

Hvala vam. Prije svega želio bih da pozdravim sve. Želio bih da pozdravim i gledaoce kraj malih ekrana koji s nama čitav dan ovdje provode. Ja bih želio samo da kažem, moja samo-kandidatura je došla kao rezultat toga da ni je dan od zastupnika iz reda Kluba Hrvatskog naroda nije želio da preuzme odgovornost i da bude kandidat i da bude predložen ispred Kluba hrvatskog naroda i meni je jako žao da se kolege poslanici iz SBB-a u ovom slučaju ponašali kao predstavnici stranke a ne kao predstavnici naroda, i ja stvarno ne bih imao ništa protiv da kolege iz SBB-a da preuzmu odgovornost jer imaju tu mogućnost da oni budu članovi rukovodstva Skupštine. Znači moja samo-kandidatura nije došla kao rezultat nečega da bih ja želio tu da jednostavno kolege zastupnici iz SBB-a mislim da bi se trebali ponašati u Klubu Hrvata kao predstavnici naroda a ne kao predstavnici stranke i taka stav zauzimati. Jer mislim da je sramotno da predstavnici hrvatskog naroda ne konzumiraju svoja puna prava koja su im Ustavom omogućena. Hvala vam.

**Poslanik/zastupnik Zvonko Marić:**

Cijenjene kolege poslanici, poštovani predsjedavajući, gledatelji. Pozdravljam vas sve. Želim naravno da čestitam predstojeće blagdane ljudima pravoslavne vjeroispovijesti, novogodišnje praznike, naravno uz najljepše želje. Ponukala me ova diskusija gđina Vukasovića tim prije što koristi poprilično teške termine, sramotno itd. To ne stoji i njegove kvalifikacije da li je to stranački ili nije, to nije njegovo da govori o tome. Ja razumijem da je kolega veoma mlad i da je tek u političkim vodama, čak razumijem i njegovu preambicioznost da nešto bude, međutim mi smo samo iskoristili zakonske mogućnost koje nam omogućava dakle Zakon. I

izjasnili smo se i bili smo suzdržani jer mi na kraju krajeva znate generalni stav da smo mi u opoziciji prema tome ni na koji način ne želimo participirati u vlasti i prema tome ja ne znam šta je čudno. Zakonska mogućnost je iskorištena i prema tome molio bih zastupnike i vas predsjedavajući da upozorite kolege ukoliko teške riječi koriste. Nešto kvalificirati kao sramotno to je zaista ispod svakog nivoa. Ja vam se zahvaljujem i ne bih o ovoj tački više da raspravljamo. Mislim da je sve rečeno i podržavam vaše stajalište da kroz zakonske procedure poduzmete aktivnosti koje će riješiti ovo pitanje.

**Predsjedavajući:**

Hvala. Obzirom da nemamo prijedloga za predsjedavajućeg ili zamjenika predsjedavajućeg iz reda hrvatskog naroda konstatujem da Skupština nije izabrala ja to ne mogu staviti na glasanje, nemam prijedloga, konstatujem da Skupština nije izabrala kandidata za predsjedavajućeg ili dopredsjedavajućeg iz reda hrvatskog naroda.

Prelazimo na izbor predsjedavajućeg ili zamjenika predsjedavajućeg iz reda Bošnjaka. Molim predsjednika Kluba Bošnjaka da predloži kandidata iz reda bošnjačkog naroda.  
Predsjednik Kluba Bošnjaka Sabahudin Delalić.

**Poslanik/zastupnik Sabahudin Delalić:**

Zahvaljujem predsjedavajući. Selamim i pozdravljam sve prisutne. Koristim priliku i ja da čestitam blagdane koji su pred nama i Novu godinu i da nam poželim dobar rad u ovom četverogodišnjem mandatu.

Klub Bošnjaka je održao konstituirajuću sjednicu i imamo prijedlog ispred Kluba Bošnjaka prijedlog za rukovodstvo Skupštine predsjedavajućeg ili dopredsjedavajući je Sabahudin Delalić.

**Predsjedavajući:**

Hvala.

Molim zastupnike da pristupe izjašnjavanju o izboru kandidata za predsjedavajućeg ili zamjenika predsjedavajućeg Skupštine Kantona Sarajevo iz reda Bošnjačkog naroda. Ko je ZA?

Konstatujem da je Skupština potvrdila izbor kandidata Sabahudina Delalića za predsjedavajućeg ili zamjenika predsjedavajućeg Skupštine Kantona Sarajevo iz rada Bošnjačkog naroda sa 21 glasom ZA, 13 suzdržanih i 1 protiv glas. Čestitam.

Prelazimo na izbor predsjedavajućeg ili zamjenika predsjedavajućeg iz reda Srba.

Molim predsjednika Kluba Srba da predloži kandidata za izbor predsjedavajućeg ili zamjenika predsjedavajućeg Skupštine Kantona Sarajevo iz reda Srpskog naroda.  
Predsjednik Kluba je Slaviša Šućur, dajte mikrofonski zastupniku Šućuru.

**Poslanik/zastupnik Slaviša Šućur:**

Klub Srba je održao sastanak. Mi također nemamo kandidata, dakle ono oko čega smo se usaglasili je da smatramo da bi rukovodstvo Skupštine trebalo da odražava i skupštinsku većinu. Pošto nje nema mi nismo se ni izjašnjavali o potencijalnim kandidatima iz našeg Kluba.

**Predsjedavajući:**

Hvala zastupniku Šućuru predstavniku Kluba Srba. Podsjećam vas shodno Poslovniku svaki Klub naroda nakon što se konstituiše izabere svoj predsjednika, dužan je obavezan da predloži kandidata za rukovodstvo Skupštine. Dakle, obzirom da iz reda Srba, nemamo prijedloga konstatujem da Skupština nije izabrala kandidata za predsjedavajućeg ili zamjenika predsjedavajućeg skupštine Kantona Sarajevo iz reda srpskog naroda.

I prelazimo na izbor, obzirom da je Kanton Sarajevo jedini implementirao presudu Sejdić – Finci, izjednačio je Ostale sa konstitutivnim narodima, time smo izmijenili Ustav i naš Poslovnik kojim sada iz reda Ostalih imamo kandidata za predsjedavajućeg ili zamjenika predsjedavajućeg.

Molim predsjednika Kluba Ostalih da predloži kandidata za izbor predsjedavajućeg ili zamjenika predsjedavajućeg Skupštine Kantona Sarajevo iz reda Ostalih. Predsjednik Kluba je Sejo Bukva, izvoli.

**Poslanik/zastupnik Sejo Bukva:**

Poštovani predsjedavajući, poštovane kolege i kolegice, poštovani ministri, poštovani gledaoci, pozdravljam vas u ime poslanika DF-a Sejo Bukva. Lista Ostalih predvođena sa Sejmom Bukvom kao predsjednikom i nosiocem te liste imenovala je ujedno i mene Sejo Bukvu za člana rukovodstva Skupština Kantona Sarajevo. Hvala.

Dajem na glasanje prijedlog Kluba Ostalih za potvrđivanje kandidata za za predsjedavajućeg ili zamjenika predsjedavajućeg Sejo Bukva.

**Od ukupno 35, 25 je bilo je ZA, 10 suzdržanih, nije bilo protiv.**

Konstatujem da je Skupština potvrdila izbor kandidata Seju Bukvu za predsjedavajućeg ili zamjenika predsjedavajućeg Skupštine Kantona Sarajevo iz rada Ostalih.

Čestitam novoizabranim kandidatima za predsjedavajućeg ili zamjenika predsjedavajućeg iz reda, Bošnjackog i reda Ostalih.

Obavještavam Vas da u skladu sa čl. 10. stav 3. Poslovnika Skupštine Kantona Sarajevo četiri kandidata čiji je izbor potvrdila Skupština između sebe odlučuju ko će biti predsjedavajući Skupštine i odluku saopćavaju Skupštini te u tom smislu, ovdje je planirano da dajem pauzu, ne dajem pauzu, kako bi potvrđeni kandidati donijeli odluku. Ovdje imamo sada specifičnu situaciju. Dakle od četiri predviđena Poslovníkom izabrali smo dva. Da li ćete vas dvojica predložiti jednog od vas da do izbora predsjednika Skupštine, predsjedavajućeg Skupštine, da jedan obavlja funkciju predsjedavajućeg Skupštine, u smislu pozivanja, sazivanja sjednica itd. Ili to nećemo uopšte uraditi nego ćete se vi dogovarati ko će sazivati sjednice Skupštine. Jer sam ja, u pauzi sam iščitao neke odredbe poslovnika koje kažu, ukoliko nema predsjedavajućeg Skupštine, jedan od zamjenika saziva sjednice vodi sjednice itd. I tu nema nikakvih problema. Ukoliko odbije, svi zamjenici, niko neće, onda jedan od zastupnika može da predsjedava itd. Međutim, obzirom da imamo izabrana dva člana za predsjedavajućeg ili zamjenika predsjedavajućeg mislim poslovnički da možete sazivati sjednice Skupštine i da život može teći normalno.

**Poslanik/zastupnik Predrag Kojović:**

Zahvaljujem predsjedavajući. Mislim da ste na dobrom tragu za pronalaženje rješenja za ovaj problem koji imamo. Vi znate, Poslovnik također predviđa i situaciju u kojoj u Skupštini nisu izabrani predstavnici nekog od konstitutivnih naroda ili iz reda Ostalih, da to mjesto ostaje upražnjeno, što govori na neki način da Poslovnik predviđa situaciju krnjeg rukovodstva Skupštine. S obzirom da također Poslovnik govori o tome da izabrani odnosno predloženi kandidati dogovorom utvrđuju ko će biti predsjedavajući a ko će biti dopredsjedavajući, jasno je da je za proces dogovora neophodno najmanje dvije osobe, što u ovom momentu imamo, i mislim da bi bilo dobro da date pauzu da se izabere predsjedavajući, jer ne moram vas podsjećati koliko je važan izbor predsjedavajućeg za proces formiranja Vlade, s obzirom da predsjedavajući Skupštine dodjeljuje mandat. Prema tome, ako smo već, kako je kolega Konaković govorio o urgentnosti današnjih procesa ostali ovdje da radimo, mislim da je dobro da pokušamo da uradimo što više moguće a to je već da sada imamo predsjedavajućeg. Tako da ta činjenica ne bi bila prepreka predlaganju mandataru za Vladu Kantona Sarajevo. Hvala.

**Predsjedavajući:**

Pauza 10 minuta, da oni saopšte kako ćemo ovo riješiti ko je predsjedavajući jer mislim da ima ovo smisla što Peđa kaže, mislim da bi oni mogli predložiti.

**NASTAVAK NAKON PAUZE****Predsjedavajući:**

Nastavljamo našu sjednicu. Sada ću ja citirati ovdje član 10. Poslovnika koji govori o izboru predsjedavajućeg i zamjenika predsjedavajućeg Skupštine Skupština Kantona Sarajevo. Član 10. kaže: „Svaki klub naroda bira i predlaže među svojim članovima po jednog kandidata na mjesto predsjedavajućeg ili zamjenika predsjedavajućeg Skupštine. Skupština glasanja potvrđuje kandidata i to natpolovičnom većinom od ukupnog broja izabranih poslanik/zastupnika. Četiri kandidata čiji je izbor potvrdila Skupština između sebe odlučuju ko će biti predsjedavajući Skupštine i odluku saopćavaju Skupštini. Obzirom da imamo situaciju da su izabrana ni tri ni četiri, dakle nemamo natpolovičnu većinu. Izabrani predsjedavajući i dopredsjedavajući Sabahudin Delalić i Sejo Bukva su se dogovorili da će sjednice sazivati i njima predsjedavati do daljnjeg, do izbora predsjednika Skupštine Sabahudin Delalić. Posljednji pasus ovog člana kaže: „Ako u Skupštini nema zastupnika, odnosno kluba nekog od konstitutivnih naroda, mjesto zamjenika predsjedavajućeg Skupštine iz tog konstitutivnog naroda ostaje upražnjeno. Dakle ono što je govorio zastupnik Kojović ne stoji jer ovdje imamo klub i imamo predsjednika kluba. Dakle, pozivam. Zastupnik Kojović, izvolite.

**Poslanik/zastupnik Predrag Kojović:**

Predsjedavajući, u prethodnoj tački koju smo razmatrali nigdje nije pisalo da jedan dio poslanika nema pravo da bude biran u rukovodstvo Skupštine. Ali smo mi tada pravnom analogijom došli do tog zaključka. Isto to kada sam govorio o ovome ja sam govorio o pravnoj analogiji. Govorio sam da Poslovnik na neki način predviđa rad krnje Skupštine i da s obzirom da zahtijeva proces dogovora u izboru predsjedavajućeg to zahtijeva najmanje dvije osobe. Ja nisam tvrdio da tako piše u Poslovniku nego sam samo iznio svoje mišljenje kako ja vidim tu stvar na isti način na koji sam govorio o prvoj tački dnevnog reda. Hvala.

**Predsjedavajući:**

Hvala vam što ste rekli da to nije u skladu sa Poslovnikom. Dakle pozivam izabrane Sabahudina Delalića i Seju Bukvu da preuzmu dalje vođenje Skupštine. I prije nego što ja zaključim, želim da vam se zahvalim na saradnji i ovim zastupnicima iz starog saziva i iz novog saziva i da iskoristim priliku da čestitam nastupajuće praznike vjernicima pravoslavne vjeroispovijesti, dakle građanima pravoslavne vjeroispovijesti i da svima čestitam Novu godinu onima koji to osjećaju kao svoj praznik. Hvala vam.

**Poslanik/zastupnik Sabahudin Delalić:**

Hvala. Zahvaljujem zastupnicima na ukazanom povjerenju i na izboru u ovo, kako gospodin Peđa Kojović kaže, krnjem rukovodstvu Skupštine Kantona. Ja se nadam da ćemo mi izabrati pravo rukovodstvo i zato se jesmo dogovorili da ja budem privremeni predsjedavajući Skupštine Kantona Sarajevo dok ne izaberemo pravo rukovodstvo. Ja se nadam da će se to ubrzo desiti. I s obzirom da je iscrpljen dnevni reda Skupštine Kantona, ja zaključujem sjednicu i zahvaljujem i vidimo se na narednoj sjednici.